



Archdiocese
OF Wellington



Caulogologo

Afio a'e o Iesu i le Lagi. (Galuega 1:1-11)

JUNE 2019

O le mea muamua lava ia tatou manatua e uiga i le Aso o le Afioa'e o Iesu i le Lagi, e le o se taeao (event) e ese mai ma le taeao o le maliu, ma le Toetu o Iesu. O le aoaoga lea a le Feagaiga Fou.

O le Maliu, Toetu ma le Afoia'e o Iesu i le Lagi o le taeao (event) e tasi. I le faaupuga a Paulo, faimai - Na faatuina a'e e le Atua Iesu nai e ua oti, ma faanofo ia te ia i lona itu taumatau (Efeso 1:20).

O Faaaliga foi a Iesu Toetu i ona Soo ma isi, o Faaaliga a Iesu mai le Lagi. Ua tatou faamamaluina eseese taeao o le tatou Faatuatua: **Maliu, Toetu, Afioa'e ma le Afio ifo o le Agaga Paia**, ina ia tatou malamalamā atili ai i vaega taitasi o mataupu o le tatou Faatuatua, ma taumafai e ola ai.

E faalua na faamatala e Luka le Afioa'e o Iesu i le Lagi:

Luka 24: 50-51, ma le **Galuega 1: 9**.

O le mafuaaga ua lua ai tala, ona o le tala o le Afioa'e o Iesu i le Lagi i le Evagelia ua faa'iu (epilogue) ai le Evagelia: O Iesu lea sa tala'i, na fasiotia i Ierusalema, ma Toetu a'e, ma ua Afio i le Lagi.

O le Tala i le Afioa'e i le Lagi i le Tusi o Galuega, o le tala amata (prologue) o le Vaega 11 o le Evagelia a Luka.

O le 40 aso na va ai le Toetu ma le Afioa'e i le Tusi o Galuega, o se taimi lea ua sauniuni ai e Iesu Toetu ona Soo mo le Afio ifo o le Agaga Paia i le Aso Penetekoso. (Manatua e maliu Iesu e le'i taitai mautu le Faatuatua o le au Soo. Sa fefefe; leiloa se mea; masalosalo; vaivai; faalotolotolu; ma isi vaivaiga faaletagata. E Afio ifo Iesu i le Lagi ua lava sauni le au Soo mo le faatalitaliga o le Agaga Paia.)

Fai mai Iesu, a sau le Agaga Paia, o ia na te faamatala ma aoao outou i mea uma na o'u fai atu ai ia te outou (Ioane 14: 26).

Na taunu folafolaga a Iesu ile aso o le Penetekoso (Faitau Galuega 2)

Sa fesili le au Soo ia Iesu Toetu, "Le Alii e, o ona po nei ea e te toe fuatai mai ai le malo ia Isalaelu?" (Galuega 1:6). O le uiga o le fesili e faapea: O Isalaelu o le nuu o le Atua. O lea sa manatu ai, e iai se aso e pulea atoa ai e Isalaelu Malo uma o le lalolagi.

Ua maliliu toa e toatele o Isalaelu sa taitai'a ana au i taua,

ae le'i taunu lava le latou faamoemoe. O lea sa faatalitali ai i le Mesia se tupu o le gafa o Tavita, e auina mai e le Atua e taitaia lona nuu i taua ma Malo. Sa manatu le au Soo ma Iutaia, o Iesu le Mesia na auina mai, ae sau Iesu, e le o Ia o se Mesia faalelalolagi, a o le Alii o le filemu.

O lea sa tali atu ai i le fesili a ona Soo: "E le tusa ona outou iloa o ona po ma ona tausaga, ua tuu e le Tama i lana lava pule. Aepeitai, o le a maua e outou le mana, pe a afio ifo le Agaga Paia i luga ia te outou; e fai foi outou ma molimau ia te a'u i Ierusalema, ma Iutaia uma lava, ma Samaria, e oo lava i le tulu'iga o le lalolagi" (Galuega 1: 7-8).

O lona uiga, fai mai Iesu - O le Malo o le Atua, e le o se Malo faalelalolagi nei, pei ona outou manatu iai. O le aso foi ua atofaina e le Atua e faataunu atoaatoa ai lona Malo, ma lana pulega o le lalolagi atoa, e leai se mea o le a outou fiailoa ai fua.

Pau le mea, faatalitali ma sauniuni mo le Afio ifo o le Agaga Paia.

A outou maua lona mana, ona outou o lea e molimau ia te a'u, amata atu i Ierusalema, e oo i tuluiga o le lalolagi.

O upu mulimuli a Iesu i ona Soo ina o le a Afio i le Lagi - faimai:

E tatau ona tala'i atu le salamo, ma le faamagaloina o agasala, amata atu i Ierusalema e oo i tuluiga o le lalolagi.

O outou e molimau ai, pe a faafuina outou i le mana mai luga, le Agaga Paia (Luka 24: 46-48).

Na faaiu toe upu a Iesu i lana faamanuiaga i ona Soo, ma o lea sa loto malolosi ai ma fiafia.

Patele Maleko Tufuga.

AFOGA KATINALE JOHN DEW



UŌ PELEINA

I nai masina talu ona filifilia Pope Faranisisi sa ia tusia se tusitusiga ua ta'ua o le FIAFIAGA O LE EVAGELIA (EVANGELII GAUDIUM). Afa'i e te fia iloa mea na talosaga mai ai Pope Faranisisi i le Ekalesia ma ana fuafuaga mo le Ekalesia, faitau le tusitusiga lenei. O ana fuafuaga tonu na mo le lumanā'i.

I le Evangelli Gaudium na ia tusia e fa'apea: O vaega o tagata o palisi ta'itasi, o se vaega o le Ekalesia Katoliko i lalo o le ta'ita'iga a lana epikopo, ua fa'apea ona vala'auina i se talanoaga fa'amisionare...o le fiafiaga a le Ekalesia i le tala'ia o Iesu Keriso ua fa'aali atu lea i le fa'anaunau e tala'i atu o ia i nu'u ua sili atu le mana'omia ma o lo'o alualu i luma i tulu'iga o ona lava teritori aga'i atu i nofoaga fou. O fea lava o i ai le mana'omia mo le malamalama ma le ola o le Keriso Toetū, e mana'o ina i ai.

Pe tatou te mafaufau 'ea i le tulaga o tatou ua vala'auina i galuega fa'amisionare? Pe tatou te mafaufau 'ea e o atu i tulu'iga o nofoaga fou, i le fa'atausi'usiu ina ia avatu se suiga i le ola ai i le Tala Lelei? O le mata'itū atoa a le Pope o le Fa'aevagelia; po'o so tatou fo'i lenā vala'aulia? Po'o

tatou faia mea ua tatou mafai ina ia mafai ona fa'aso atu le Tala Lelei a le Evagelia o lo'o fa'atasi le Atua ma i tatou, ua fa'aolaina i tatou e Iesu, ma le Agaga Pa'ia o lo'o ta'ita'ia ma fa'atonu i tatou. Ua avatu e le Evagelia le fa'amoemoe iā i latou o lo'o tauivi ma lenei olaga ma o i tatou ua fa'amanuiaina ma maua i ai se avanoa lelei e avatu ai le ola ma le fa'amoemoe i isi.

I lenei tusitusiga ou te talosaga atu iā outou uma ina ia tomanatunatu i le tulaga o ali'i uma ma tama'ita'i uma OSE misiona; o le mafua'aga lenā o o tatou olaga i lenei lalolagi. I le Pule'aga Fa'aakiepikopo ua tatou i ai, mo le tele o tausaga, sa a'oa'oina tagata i le Auaunaga (Stewardship) ma taumafai e fesoasoani i isi e iloa lenā "fa'aso'oina ma le fa'anaunauga" o la tatou tali sili i le alofa fai pea ma le anoanoa'i a le Atua. Ou te talitonu o le fa'amaopo maia le "Fa'aso'oina i le Fa'anaunauga" o se vaega faifai pea a lo tatou "liua fa'amisionare". O le lu'i mo tatou o le faia fa'avave nei loa. O le ola ai o lo tatou fa'atutu e le na o mea e tutupu i totonu o falesā. Ioe, tatou te 'au ai i Misasa ina ia avea i tatou ma vaega o se fa'apotopotoga ola ma le fiafia; ina ia fa'aosofia ma lu'itaunia i tatou e le Upu a le Atua; ina ia fafagaina ma fa'aolaina e le meaalofa ole Eukalisitisa. O nei meaalofa uma ua lē mo se to'atasi, ua foa'i mai ina ia tatou ola ai le misiona a le Sinoti a le Pule'aga i le lua tausaga talu ai ina ua tatou tomanatunatu i le sini "**O, Ua Auina atu Outou**"

Ua tatou malamalama lelei lava i o tatou olaga ta'ito'atasi tatou te taumafai e sui i aso ta'itasi, ina ia alofa atu, onosa'i, agalelei ma fa'amaoni. O le "Liliu" o se lu'itau i aso ta'itasi, fa'apea fo'i le "Liua Fa'aso'o." Ua i ai nei se galuega e fai, i le Papatisoga ma le Kofilimasio na fa'au'uina i tatou mo le galuega o le avea ma "misiona."

E tatau ona tatou amata loa?

Ma Fa'amanuiaga uma lava

+ Ioane

O LE MALAMALAMA I OU ALA

I le afiafi i luma mai o lona maliu, sa 'au atu ai Iesu i se talanoaga matagofie ma ona so'o. Ua ta'ua lenei o le tatalo a le Ositaluga Sili ma ua 'a'afia ai ma ni Mataupu o le Evagelia a Ioane, o se tautalaga pito sili le umi i le Feagai-ga Fou. Ua tatou faitau ai i Misasa o le vaitau o le Eseta.

I se faitauga pu'upu'u mai faitauga o le aso 16 Juni, ua fai mai le Ali'i, ua totoe iā te a'u mea e tele e fai atu ai iā te

outou, ae tou te lē mafai ona talia i nei ona po. Ae a maliu mai o ia, o le Agaga lea e tupu mai ai le 'upu moni, e ta'itai e ia iā te outou i upu moni uma. O se tasi o mea taūa tele o a'oa'oga Kerisiano – ua maitauina e le 'au su'esu'e mai iā Vincent o Lerins aga'i atu iā Henry Newman – e tuputupu ma talatala i le tele o aso. E le tatau ona tatou manatu i a'oa'oga a le Ekalesia o se ta'aloga ua na ona tu'u fa'asolo mai i lea augatupulaga i lea augatupulaga. Ae pei o se tino e

O LE MALAMALAMA I OU ALA

tuputupu pea ma ola, e tumau o ia lava e ui ona e tele se suiga o le a o'o i ai. Pe fa'aoga se fa'atusa a Katinale Newman, ua pei o se vai tafe ua amata o se vai puna la'ititi, ae ua lautele ma loloto a o tūlei mai lona auala e ala i taimi ma avanoa.

Na fa'amanino mai e Newman o manatu tetele a Kerisiano e le o maua uma i laupepa tusitusi ae o lo'o maua lelei i mafaufa ola, se tasi o fai mafaufa o lo'o fefulia'i se a'oa'oga, va'ava'a'i i vaega uma ta'itasi, ona tu'u atu lea i se isi fai mafaufa e na te faia fa'apea ma fepasia'i ai fa'apenā i isi augatupulaga. O le a le mea e ta'ita'ia ai lenei faiga? O le Agaga Pa'ia o lo'o ta'ua e Iesu i le tatalo a Ositaulaga Sili, le Tagata mamana ua ta'ita'ia le Ekalesia i le moni atoatoa.

I SAKALAMETA UA TATOU FEILOA'I ATU AI I LE KERISO LE FA'AOLA

O mamalu na ta'ita'ia maia i tatou mai le vaitau o le Eseta ua folafolā maia le afio ai fa'avae o Keriso.

O le Afio a'e o le Ali'i na valo'ia pe na fa'aata mai e Perofeta o Elia ma Elisara. Ina ua iloa e Elisara o le a avea Elia i le lag i se kaliota, sa ia 'ai'oi atu mo lona agaga, ina fa'aauau pea lona i ai i Israaelu. Na fai atu Elia afai na te iloa atu ua avatu le perofeta i luga, o le a taliaina e Elisara lona agaga. Na fa'ataunu'uina lea folafolaga ma na fa'aauau pea e Elisara le i ai ma le galuega a le perofeta o Elia.

Ae le'i si'itia Iesu i le lag i na ia fa'atonu i latou e fa'atali mo le Agaga Pa'ia. Na alu ifo le Agaga i luga o Apostetoli i le Penetekoso ina ia fa'aauau pea le i ai o Keriso i totonu ma ala iā te latou.

I le fa'amamaluina o le Tasi Tolu Pa'ia, ua tatou patipatia se Misitelio o lo'o ola fa'atasi ma i tatou. Ona i le Tausama'aga Mulimuli na folafola atu ai e Iesu, *Afai e alofa mai se tasi iā te a'u e tausia e ia la'u upu, alofa fo'i lo'u Tamā iā te ia, e ō mai fo'i i ma'uia iā te ia, matou te nonofo ma ia* (Ioane 14: 23). I se āta ta'uta'ua na tusia e Andrei Rublev, o le Tasitolu o lo'o i se laulau ma ni nofoa e leai nisi o nonofo ai, o lo'o vala'aulia i tatou ta'ito'atasi i le latou faiga'ai.

I le aso Sa o le Tino o Keriso, ua tatou fiafia ai i le meaalofa o lenā faiga'ai, le afio ai o Keriso i le Eukalositia, le punavai ma le fa'atumutumuga o le olaga Kerisiano – o se olaga ua ulufia e lona afio ai ona e ala mai iā ia, fa'atasi ma ia ma i totonu iā te ia.

Ua Toetū o Ia, ma o lo'o afio ai pea, i taimi uma.

O Mea ua Tatou Talitonu i ai

O Lē na faia le lag i ma le lalolagi, ma faia le tagata i le amataga o le na folafola e ala i le tulafono ma perofeta na maua le tino mai le Taupou na fa'atautau i luga o le la'a'au na tanuina i le 'ele'ele na fa'atuiua mai le oti ma si'itia i le maualuga o le lag i o lo'o nofo i le itū taumatau o le Tamā e i ai le mana e lavea'ia ai mea uma lava na ala ai ona gaioi le Tamā mai le amataga se'ia o'o i le fa'avavaau
O le Alefa ma le Omeka lenei
O le amataga ma le i'uga
Le amataga ma le i'uga e le mafa'amatalaina.
O le Tupu lenei,
O le Keriso lenei

O Iesu lenei
O le Ta'ita'i lenei
O le Ali'i lenei
O ia lenei na toetū mai le oti
O ia lenei o lo'o nofo ile itū taumatau o le Tamā
Na te tau'ave le Tamā ma na fanau mai iā te ia
O ia o le mamalu ma le malosi e fa'avavau... Amene

O le Misitelio o le Tasitolu

O le fa'atuatua i le Tasitolu o lo'o malolo lea i le fa'aaliga a le Atua o ia lava i le fa'agalueaina o le fa'aolataga. Tatou te lē mafai ona o'o atu i le Tasitolu i fafo atu i mea ua fa'alua e le Atua iā i tatou i le auina mai o lona Alo ma aumai iā i tatou le Agaga Pa'ia. O vaega taūa tele lenei. O fa'atuatua Fa'atasitolu ua 'ese mai i le a'afiaga e amata i le maitauina o le natura, po'o le a'oa'oina o aganu'u ua iloga, po'o le amata mai le finauga po'o le fa'ailoaina o le tagata. O lo'o ta'oto lelei i le meaalofa na faia e le Atua ina ua ia avatu le mafai i le tagata e iloaina o ia i le fa'atuatua. O le fa'aalia o le Tasitolu na fa'ataunu'uina ina ua sau le Atua lava ia i le tala'aga a le tagata: Auā ua alofa mai le Atua i le lalolagi ua ia aumai ai lona atali'i e to'atasi (Ioane 3: 16); ua fa'amaligi mai le alofa o le Atua i o tatou loto e le Agaga Pa'ia ua foa'iina mai iā te i tatou (Roma 5: 5)...

E lua ni vaega o lenei fa'amausalī e tatau ona va'ava'i i ai. Muamua, o le malamalama o lē fa'atuatua i le Tasitolu o lo'o ta'oto lea i le fa'aaliga na tupu i upu ma mea na tutupu i le tala fa'asolopito o lo'o feso'ota'i ai upu. O mea ia na tutupu ole Liutino o le Alo o le Atua ma lona olaga i tulaga fa'atagata, fa'apea le auina mai o le Agaga Pa'ia i le Ekalesia i le aso o le Penetekoso. O lenei fa'aaliga o le Tasitolu e 'ese mai i isi ituaiga o fa'aaliga (fa'ata'ita'iga, le fa'aaliga a le Atua e mafai ona fai i le na o le musuia mai totonu o mafaufa a perofeta), ona o le fa'aaliga a le Tasitolu na tupu i mea na fa'aalua i mata o le tagata. Lona lua, i nei musuia, o le Atua lava ia na sau. O le Atua e le gata o le amataga o nei mea na tutupu, ae sa tu'uina atu o ia lava i ai. O le mea lea, o le Liutino, le Alo o le Atua na avea ma tagata ma, o lona ola ma lana taulaga i luga o le koluse, na maua mai ai le fa'aolataga e ala i le alofa a lona Tamā ma ala i le alofa o le tagata. E fa'apea fo'i, i le Penetekoso, o le Agaga Pa'ia lava ia ua foa'i ma sau e mau i totonu o loto o le 'au fa'atuatua. Ona o le kalasia a le Agaga Pa'ia, na talia ai e le 'au fa'atuatua Iesu o le Alo o le Atua, le Tamā lava ia na sau ma nofo i o latou loto e pei ona folafolaina mai e Iesu: "Afai e alofa mai se tasi iā te a'u, e tausia e ia la'u upu, e alofa fo'i lo'u Tamā iā te ia, e ō mai fo'i i ma'uia iā te ia, matou te nonofo ma ia (Ioane 14: 23). I mea na tutupu o le fa'aolataga, o le Atua le Tasitolu e le'i avatua na o se mea, ae ua avatu o ia lava: O le Atua le Tamā ua auina atu lona Alo ma liligi atu lona Agaga Pa'ia. O vaega ia e lua (na fa'aalia le Atua i mea na tutupu, ma i nei mea na ia avatu ai o ia lava i le 'au fa'atuatua) o lo'o i le ogatotonu lea o le fa'aaliga a le Tasitolu. Ua fa'avae ai le mautū ma le vaega fa'apitoa o le talitonuga fa'aevagelia o lo'o manino lelei mai ai i isi a'afiaga fa'alelotu.

O Ala o Tatalo – O Se Masani Lelei

Fai mai se tasi o Tusi tala: "E le tele mea ua mamanu e tatalo e lē mailoa e lenei lalolagi." O le a lea mea o le tatalo? O se fa'auigaina tuai e fa'apea: "O le Tatalo o le si'i a'e o le mafaufa ma le loto i le Atua." E fesoasoani tele, fa'apea e fa'aoga fo'i i auala mautū e fa o talotaloga: fa'amemelo, fa'afetai, ta'uta'u atu (kofesio) ma le talosaga

O LE MALAMALAMA I OU ALA

O le talia o le manatu e faigofie, ae o tatalo ta'ito'atasi o se vaega o tatou olaga – o se lu'itau lea. E fa'apefea ona tatou feiloa'i atu i ai?

O nisi o le a liliu atu i tatalo i taimi o fa'aletonu ma le popole; o nisi ona ua lagona le lafoa'i, o isi ina ua fa'anaunau tele i se mea mo latou lava po'o isi.

O lo'o i ai se mea e fa'atautaia i nei mea uma, ae o lo'o i ai fo'i ma se mea e lē o i ai ma i lenā mea o le masani. Ua alagatatau mo le malosi fa'aleagaga ma le taumauga o se olaga Kerisiano e tatalo se tagata ma le fa'atuatua fai so'o. E pei ona fai mai ai se faia'oga - “o le mānava mole tino, fa'apea foi le tatalo mo le agaga,” ma na fa'aopopo mai ai fo'i, o le a le mea e tupu i le tino pe afai e te mānava na o aso Gafua, Aso Lulu ma aso Faraile?”


O le olaga tatalo e le tatau ona fuaina ile pu'upu'u ma le umi; e le tatau ona popole i faiga ona atonu e tele auala e tatalo ai e pei ona tele tagata e tatalo. O le mea taūa e le fa'apefea ona tatou tatalo, ae o lā tatou te tatalo. E le gata i lea, ole 'auga o tatalo e lē o le gagau mai o le loto o le Atua iā i tatou ae ole gagau o tatou loto i lona finagalo.

O le isi uiga o le tatalo na sau mai iā Katinale Hume: o

Tatalo o le fa'amaimau taimi mo le Atua.” Ua pei na vala'auina i tatou e fuli le uati aga'i i le puipui fa'agalo mea uma o lo'o si'osi'omia ai i tatou ina ia maua le filemū ma le panagoa, o se avanoa e talanoa ai to'atasi ma le Atua ma, o le fa'atumutumuga, fa'alogi i ai.

SAGATO PANAPA— APOSETOLO

4



O Panapa o se Iutaia mai Cyprus, o se tasi e i fafo atu o le to'asefulu na toe-toe lava ona avea o se tasi o apostolo o le to'asefululua. Sa mafana le ma-futaga iā Sagato Paulo (sa ia fa'amasani Paulo iā Peteru ma isi apostolo) ma sa 'au'auna e pei o se so'o upu i le va o lē sa avea ma lē sa sauaina ma Kerisiano Iutaia sa masalosalo pea.


Ina ua mautū se fa'apotopotoga Kerisiano i Anetioka, na auina atu Panapa o se suli aloa'ia o le Ekalesia i Ierusalema e aofai mai i latou i le fa'apotoptoga. O ia ma Paulo na a'oa'o i Anitioka mo se tausaga, ona malaga atu ai lea i Ierusalem. Mulimuli mai ai, o Paulo ma Panapa, ua manino lelei o ni ta'ita'i lelei, ua auina atu e ta'ita'i o Anetioka e tala'i i nu'u 'ese. Na matua'i manuia le la galuega. Ina ua mae'a se wavega i Lusa, na manana'o tagata e momoli ni taulaga iā i la'ua o ni atua – o Panapa o Seu, ma Paulo, Hereme – ae na fai mai o la'ua, “O tagata lava i mā'ua nei e tutusa ma outou, ua ma folafola atu le tala lelei iā te outou, ia outou lafoa'i nei mea lē aogā, ma liliu mai i le Atua soifua’ (Galuega 14: 8 – 18).

Ae le'i filemū o mea uma. Na tuli 'esea mai i la'ua mai lea 'a'ai, ma na la malaga atu i Ierusalema e toe fa'amanino le mataupu o lo'o finau so'o ai e uiga i le peritomeina ma e o'o lava i le mafana o se faigauō e i ai lava se

fe'ese'eseaina. Ina ua mana'o Paulo e toe asiasia nofoaga sa la fa'aevageliaina, na mana'o Panapa e ave ma Ioane Mareko, lona tausoga, le na tusia le Evagelia, ae o Paulo na finau ona sa tia'ia muamua i la'ua e Mareko e le tatau ona sau fa'atasi ma i la'ua. O le fe'ese'esega na tupu mai ai na matuā faifai tetele na mavaevae ai loa Panapa ma Paulo, o Panapa na avea Mareko i Cyprus, a o Paulo na avea Silao i Syria. Mulimuli ane, na toe fa'aleleia i latou, Paulo, Panapa ma Mareko.

Ina ua finau atu Paulo iā Peteru i le musu o Peteru e 'a'ai fa'atasi ma tagata o nu'u ese ona o le fefe i ana uō Iutaia, na tatou iloaina na o'o lava ina tosina o Panapa lava i lo latou le fa'amaoni' (Kalatia 2: 1 – 13)

‘IA VI’IA OE’ (LAUDATO SI` - Pope Falanisisi)



MATAUPU E TOLU

O ‘A’A FA’ALE-TAGATA E MAFUA AI MALA FA’ALE-NATURA.

101. E faigata tele fa’amaoniga e aunoa ma se malamalama’aga i ulua’i mafua’aga fa’ale-tagata o fa’afitaui o le si’osi’omaga. O se tasi o auala malamalama i le soifuaga o le tagata ma ana gaoioiga sese, ua ogaoga ai le afaina o le lalolagi o lo’o siomia ai i tatou. E le tatau ea ona tatou fa’atali teisi ma tomanātu i lenei mea? I lenei la’asaga, ou te fautou atu ina ia taula’i le tatou puleaina o fa’ataitaiga fa’atekonolosi ma le tulaga o tagata soifua fa’apea ma gaoioiga fa’aletagata i le lalolagi.

TEKONOLOSI: GAIOIGA MA LONA MALOSIAGA

102. Ua ulufale le tagata soifua i se vaitau fou lea ua aumaia i tatou i se auala-kolosi ona o le tomai fa’atekonolosi. O i tatou o ni tagata fa’amanuiaina i le lua seneturi o galu matautia o suiga: o afi aūsa, nofoaafi, telekalama, eletise, ta’avale, va’alele, falegaosi vaila’au, vaila’au fa’aponaponei, fa’amatolaga o tekonolesi ma, talu ai nei suiga o masini fa’afuainumera, masini fa’atagata, tekonolosiola ma tekonolesi fa’asainenitisi. E moni ma tatou le sagisagi i nei auala ma ia fa’aosofia le fiafia i le tele o avanoa ua maua e tu’utu’uloloa ai pea le tatalaina mai mo i tatou, mo le “sainenisi ma tekonolesi o ni oloa matagofie o le foafoaga na foai mai e le Atua mo le fa’atinoina o galuega a le tagata.” O le fesuiaiga o le natura mo fuafuaga aogā ua iloga ai le aiga-tagata mai le amataga; o le tekonolesi lava ia “ua fa’aalialia ai le loto ma’elegā lea e fa’aosofia ai le tagata e la’asia malie ai ona tapula’fa’alelagata.” I le Tekonolesi ua fa’atonutonufolau ai le mau mea leaga lea e masani ona fa’aleaga ma fa’atapula’ai le tagata soifua. E mafai fa’apefa ona tatou lē lagona le agaga fa’agae’etia ma le talisapaia lenei fa’afulu’iga, aemaise lava i malae fa’atogafitiga, fa’ainisinia ma feso’otaiga? E fa’apefa ona tatou lē fa’ailoa le galuega a le tele o saienitisi ma inisinia o e na filitapena auala e gafataulimaina ai atina’e?

103. I le matatā fa’asainenisi, afai ae fa’atonutonuina lelei, e mafai ona maua ai auala e fa’aleleia ai vaega tāua o le soifuaga o le tagata, mai meafale aogā seia o’o atu i le maoa’e o tulaga o fela’uaiga, o aualalaupapa, o fale ma nofoaga faitele. E mafai foi ona gaosia ai ata ma o le a mafai ai e ali’i ma tamaitai ona magoto i le lalolagi fa’al- etino ma “ae ae” i le lalelei o le lalolagi. O ai e mafai ona fa’afitia le matagofie o se va’alele po’o se fale umī i le vanimonimo? O galuega tāua o ata ma musika ua fa’aaogaina ai nei tekonolesi fou. Lona uiga, i le matagofie na afuafua e lē na fa’aaogaina a’upega o tekonolesi fou ma mafaufauga loloto i lea matagofie, ua se’elili’ai, ma mafua ai se atoatoaga lea ua patino i le tagata.

104. Ae peitai, e tatau foi ona fa’ailo le malosiaga fa’aniukilia, o tekonolesiola, fa’amatolaga fa’atekonolosi, malamalama i lo tatou DNA, ma le tele o isi tomai ua tatou maua, ua tatou maua ai le malosiaga tele. Ae o le mea moni, ua latou aumaia nei mea ua fa’aa’uupegaina i le tomai, aemaise lava le fa’aaogaina i punaoa o tamaoaiga, o se puleaga maoa’e aoao i tagata uma fa’apea le lalolagi atoa. E le’i i ai i le aiga-tagata se malosiaga fa’aletagata fa’apenei, peitai, e leai se mautinoa o le a fa’aaogaina ma le atamai, aemaise lava pe a tatou iloilo pe fa’apefea ona fa’aaogaina i aso nei. Tatou te tōmanatu, ma mafaufaui pomu niukilia na fa’apā’ū’ūina i le ogatotonu o le seneturi luasefulu, po’o le aotelega o tekonolesi na fa’aaogaina e le itu fa’aupefaio mālō a le Nazi a Siamani, o faigamālō Fa’akomunisi ma isi taupulega fa’aupefaui na fa’afaigaluegaina ina ia fasiotia le miliona o tagata, ae lē tā’ua ai le fa’atupula’ia o fale-teu’āupega mata’utia ua fa’aaogaga mo taua i aso nei. O lima o ai e pa’ū uma i ai nei malosiaga, pe o le ‘i’uga ea o le a fa’amuta ai? E matuā lamatia lava se vaega itiiti o tagata soifua e maua ai.

105. E tulolo le talitonuga i so’o se si’itiaga o le malosiaga, o lona uiga “ua fa’atupulaia lona aagā’i i luma”, le maualuga o tulaga i le “puipuiga, lona aogā, le tamaoaiga ma le malosi; … o le feulufa’iga o tu ma aga fou i totonu o fetafeā’iga o aganu’u” ma ua peisea’i o se mea moni, o uiga lelei ma le meamoni ua otometi le tafe mai i malosiaga fa’atekonolosi ma malosiaga tau tamaoaiga fa’apena. O le meamoni o le “tagata i lea vaitau e lē’i a’oa’oina lelei i le fa’aaogaina o le malosi,” talu ai le maoa’e o le tatou atina’e fa’atekonolosi ua lē tauosa lea ma le atina’eina o matafaioi fa’aletagata, o tu ma aga ma le tofāilo. So’o se tausaga o le tagata e foliga mai ua na’o sina malamalama itiiti lava i ona lava tapula’ā. E mafai ona tatou lē malamalama i le mamafa o lu’itau ua tatou feagai nei.

“E fa’atupulaia pea i lea aso ma lea aso le lamatiaina ma ua lē mafai ai e le tagata ona fa’aaogaina lona malosiaga e tatou ai;” o lona afaina, “e lē mafai ona mafaufauna le malosiaga i tulaga tau matafaioi o filifiliga lea e fanau mai i le saolotoga” talu mai “lona tulafono tutasi ua ave’esea mai tu’uaiga tatou, mai so’o se mea aogā po’o le puipuiga.” Ae o tagata soifua e lē tuto’atasi lana pulefitalia. O lo tatou saolotoga o le a mou atu pe a tu’uina atu i malosiaga tauaso o le lēmailoa, o manaoga e lēfa’atalia, o manaoga patino i le tagata lava ia, fa’apea ma sauāga. I lenei tulaga, tatou te tutū telenoa ma fa’ali i foliga o lo tatou malosi fa’ateleina pea, ma ua leai se mea e mafai ona pulea ai. E i ai ni a tatou lava gaoiga papa’u, ae lē mafai ona tatou tapā e maua mai ai se si’uleo o tu ma aga, se aganu’u ma se fa’aleagaga ae mafai ona fa’amaonia le fa’ataotoina o ni tapula’ā ma a’oa’oina le pulea manino o noanoataga o le tagata lava ia.

.....fa’aaauau pea.....Falefou Sio...

MAI A SAKARIA IA AKAPUSI: O LE AGAGA PAIA ILE EVAGELIA A LUKA MA LE TUSI O GALUEGA A LE AU APOSETOLO - MAI LE LOLOMIGA ME 2019

Mai tusitusiga a Adrian Graffy – fa’aliliuina e Lauano Ilaoa

Ole Agaga Paia e aupito i sili ona talanoaina ma ta’ua i totonu ole Evagelia a Luka,nai lo isi Evagelia uma ile Tusi Paia.O le tusitusiga muamua lenei ua su’esu’eina ai ia fa’apuga o lo’o fa’atatau ile Agaga Paia i le Evagelia a Luka,fa’apea ma lona lua o ana tusi ile ‘Galuega a le Au Aposetolo’. E fa’apefea i nei tusitusiga o le Feagaiga Fou, ona avea ma ta’iala o lo tatou iloa ole galuega a le Agaga Paia, ma lo tatou talitonuga iai ile aga’i i luma? E pei ona saunoa le Tama Paia ia Pope Falanisisi, o le Ekalesia ‘o se avanoa malu puipuia’, e mafai ona gaioi ai le Agaga Paia. O Patele Adrian Graffy, o le Fai-feau Pule ole aulotu a Gidea Park, ma o ia o se sui auai ole Komisi Filifilia a le Tupusa mo Suesuega ole Tusi Paia.

(Vaega Lua)

Meaalofa o le Agaga Paia ile tusi o Galuega

O le galuega a le Agaga i totonu ole Ekalesia na iloga ona malosi lona amataga ile taimi ole sauniga fa’-a-lutaia, ole Penetekoso.O loo fa’amatala i se faiga fa’atala fa’atino e Luka ia le afio ifo ole Agaga i le Ekalesia.O le taunu’uga ole Evagelia a Ioane, o lo’o saunoa manino ai le Alii o Iesu, ma fa’apea atu i lona au so’o, ‘Ia outou talia le Agaga Pa’ia’ (Ioane 20.22).Ae mo Luka, o le afio ifo ole Agaga, o lo’o fa’amatatalaina sa peisea’i o le mautagi ua agi tele mai, ma ‘laulaufaiva ua peisea’i ole afi ua vaevaeina’ (Galuega 2.2-3). O le afi e mautinoa e le o se afi o le fa’amasinoga, ae feso’ota’i ma le meaalofa o tulafono i le Mauga o Sinai (Esoto 19.18). O le fa’apuga aupito i taua,e fa’apea o latou sa fa’atasi ai, “ua fa’atumutumuina foi i latou uma ile Agaga Paia, ua afua ai ona tautala i gagana ‘ese’ese, pei ona foa’iina mai e le Agaga Paia ole gagana ia te i latou”

O le sauniga ole fa’amamaluina lea ole malagasa ile tuanai ai ole fitu vайaso talu ona mavae le Pasefika ole Maliu o Keriso. O le Penetekoso, *shabu’ot*, ole ‘fa’amamaluina o vайaso’, e fa’amanatu ai le meaalofa ole Tulafono. E to’atele tagata Iutaia mai malo ‘ese’ese ua fa’atasia ai i Ierusalem. O le taofi la o Luka, sa lagona e latou uma nei mea uma sa tautalagia i a latou lava gagana. O ia tulaga e ‘ese’ese ma tu i mea fa’aleagaga ma le tautala i gagana atoa ma perofetaga, e pei ona talanoaina ma fa’amatatalaina ile tusi muamua 1 Korinrito.14. Ua manino ai i lea vaega ia le taimi na

fa’apitoa mai salamo ia na valo’ia ai le filifilia o Matatia e fai ma so’o o Iesu i le tofiga aposetolo (Galu 1.16,20). I le Galuega 2.16-21, o loo ia fa’amatatalana ai le afio ifo ole Agaga, i lona fa’aaogaina lea o le tele o upu a le perofeta o Ioelu. Sa fa’ailoa mai ai e le Alii, ‘o ia foi aso ou te liligi ifo ai lo’u Agaga i luga o a’u auauna tane, ma a’u auauna fafine..’ O le manatu o Luka, e leai se isi tusitusiga e aupito sili ona taua e fa’ailoa atu ai le Talalelei i nuu uma nai lo lenei, e pei ona autū iai lana tusi i Galuega a le Au Aposetolo.

I le tau fa’ai’ui’u ai o lana tautalaga, ma lona toe fa’aaogaina o Tusitusiga Paia, sa fa’apea ai ona toe faamamafaina e Peteru le si’itiaga mamalu o Iesu ma lona liligiina mai o le “meaalofa ole Agaga Paia”, mai le Tamā (Galuega 2.33). Ina ua fesiliglia e le motu o tagata sa fa’alogologo ai, po o le a le mea e tatau ona latou fai, sa fa’apea ane Peteru, o le papatisoga ma le ‘meaalofa ole Agaga Paia’, e tatau ona maua e tagata uma (Galu 2.38).O lea folafolaga e le mo na o latou ma a latou fanau, ae mo tagata uma e vala’auina e le Atua (Galu.2.39). O le talileleia e tagata o lea tulaga, e atagia lea i le papatisoina o tagata e tolu afe le aofa’i (Galu.2.41). E iai se fa’asologa tulaga ‘ese ile talia ole Agaga, mai le avea o se meaalofa fa’apitoa mo tagata ta’itoatasi, e aofia ai Sakaria, o Elisapeta, Peteru atoa ma Setefano, o e sa filifilia mo ni fe’au fa’apitoa a le Alii, i le fa’amanaina o se vaega to’atele o tagata.

Sa lei ‘asa ma sauaga

Ua amata le galuega tala’i, ae sa le’i ‘asa ma sauaga. O le o’o ane o Peteru faa’pea ma Ioane i le Sanerini, sa ‘fa’atumulia ai Peteru ile Agaga Pa’ia (Galu.4.8), ao ia finau ma tautala atu i luma o ta’ita’i fa’alelotu e tusa o le usaita’i ‘ia outou po’o le Atua’ (Galu.4.19). E fa’ai’u le mataupu i talosaga a tagata e toatele, ma faasolo atu ai i le tulaga ua ta’ua o se ‘penetekoso laititi’, i le toe taua o ni uiga faitino e fa’amatatalaina ai; “Ua mavae atu la latou tatalo, ona luluina lea ole mea ua fa’apotopoto ai latou, ua tutumu foi i latou uma ile Agaga Paia, ma ua tautala atu ile afioga a le Atua ma le loto tele.” (Galu.4.31). E le o taua fa’apitoa i le mataupu lenei, le tomai e tautala ai i gagana

MAI A SAKARIA IA AKAPUSI: O LE AGAGA PAIA ILE EVAGELIA A LUKA MA LE TUSI O GALUEGA A LE AU APOSETOLO - FA'ALILIUINA LAUANO A. ILAOA

‘ese, ae o lo’o faamamafaina le itu e uiga i le tau-tala malosi ma le loto tele, e tala’i atu ai le ‘Upu a le Alii”

Peitai, e iai lava i latou e te’ena ma lē fiafia ile galuega a le Agaga. O Ananina ma lona toalua o Safira ia sa o laua nanā ma teu fa’alilolilo se vaega o le tupe na la maua ile fa’atauina atu o se fasi fanua, na mulimuli ane tu’uaia e Peteru i ‘lo laua ‘olegia ole Agaga Paia’. O lenei tala fa’anoanoa ma uiga ‘ese, e pei ona fa’amauina e Lukana feoti ai lenei ulugalii.(Galu 5.9).

Sa fa’aaau pea le galuega tala’i a le ‘au apostolo. E toatele na lafo ile falepuipui ona o le latou tala’iga ma le folafolaina ole finagalo ole Alii. E tele foi taimi na fa’asaoina ai i latou mai le oti ma le mau vavega sa molimauna ao feagai ai ma sauaga ona o le tete’e o tagata ile talalelei ma le finagalo ole Atua.Poitai, e tele taimi sa tu malosi ai Peteru ma le au apostolo e fa’amautu ma faatumau lo latou “usita’i” ma le fa’atuaule ilie Alii ae le o tagata (Galu.5.29).Sa latou faamalosi ona folafola atu le Maliu ma le Toetu Manumalo ole Keriso ma fa’ailoa atu ile lalolagi. “O ana molimau foi i ia mea o i matou, atoa foi ma le Agaga Paia, le ua foaiina atu e le Atua i e anaana ia te ia” (Galu.5.32). O le mautinoa ma le talitonu atoatoa ile mana ole Agaga Paia, ole a oo i lona taualuga ile Galuega 15.28. “Aua ua lelei ile Agaga Paia ma i matou nei, ia le fa’ae’e atu se tasi avega ia te outou, na o nei mea e tatau”

A’o fa’agasolo pea i luma le galuega a le Ekalesia, sa mana’omia nisi faifeau fou.E toafitu tagata na filifilia e fesoasoani mo le tufatufaina

atu o taumafa i aso taitasi. O le agava’a aupito ttau mo lenei matafaioi, e tatau, “ona tutumu ile Agaga Paia ma le poto ” (Galu.6.3). O Setefano le tagata sa tulaga’ese mai le toafitu lenei, e fa’apea o ia o se tasi, “ua tumu ile Agaga Paia ma fa’atuaatua” (Galu 6.5). Sa sili mamao atu lana galuega nai lo le tufatufaina o taumafa, e pei ona atagia i lana lauga o lo’o fa’amauina ile Galuega.7. Sa le’i mafai e tagata sa ita ma molia o ia i le tulafono ona fa’afetaia’i i lona poto ma le mana ole Agaga Pa’ia sa ia tautala iai. (Galu.6.10). O le fa’aiuga o se tasi o ana tautalaga umi, na ia tu’uaia ai i latou sa fa’alogologo ai, i lo latou te’ena ole Agaga Paia (Galu.7.51). Sa fa’aosofia e le Agaga Paia le lauga mulimuli lenei a Setefano, a’o lei fasiotia o ia, o le ulua’i Kerisiano na maliu fa’amaletile. (Galu.7.55).

O le o’o atu ole Agaga, e pei ona ttau ile tusi o Galuega i tuāpā o Ierusalem ma “tulu’iga ole lalolagi”, o le a taumafai e talannoaina i le vaeg e lua o le tusitusiga lenei i se taimi oi luma.

7

O LE AUALA A IESU (ITULAU 33 – 38)

Faaliliuina – Falanisisi Anamani

O tatou matua o ni fa’amatosi’au ia i tatou pe a tatou tomānatu i o latou olaga o le foa’i atu o i latou lava, o le tasi mo le tasi, atoa foi mo isi. Pe ana leai ā latou auauanga ma le lima foa’i atonu tatou te le maua le faatuatua o lo’o ia i tatou i aso nei, ma e tatou te manana’o e fa’asoia atu le faatuatua ma le alofa lenā ia tatou fanau, fanau a fanau atoa ma isi. Ma o le a liliu o tatou mafaufauga, i le taulaga sili na fai e Keriso mo i tatou. Na Ia faia, e le faapea tau ina ia faataunu, ae peita’i ona o lona alofa nauā mo i tatou. E ao ina manatua, pau lava le mea o loo Ia faatoga mai mo i tatou ia tatou faia o le alofa atu lea ia te Ia atoa ma isi. Ae o le a lē loloto se uiga o le ta’u atu i isi, tatou te alolofa ia i latou pe a fai tatou te lē taumafai, e faaali atu lenā alofa i se auala

mautu.

Paulo ma Peti Eck o Wichita Kansas

O LE FAA-A’OA’OGA A IESU

O Iesu o le faiao’ga sili o le ‘au’auanga Faakerisiano, e pei ona ia faia i nisi o vaega ta’itasi o le olaga Kerisiano, ma o a’oa’oga a Iesu ma lona soifua sasa’ a e tāua. O lea, pei e atagia mai o le ola sasaa atu e le tele sona ttau i le auauanga, peita’i e le’i faapea ile tulaga ia Iesu. O lona soifua sasaa atu e le o se faafiti atoatoa mo ia lava, ae ua tuu ese lona lava tagata, ua tumu o ia i le finagalo o le Tamā, ma o le ala lenei ua Ia faataunuina ai: “O la’u mea e ai, ia ou faia le finagalo o Lē na ‘auina mai a’u, ma faai’u lana galuega fai tatou te lē taumafai, e faaali atu lenā alofa i se auala

O LE AUALA A IESU (ITULAU 33 – 38)

ga.” (Ioane 4:34)

O le galuega a Iesu o le toe faaleleia lea i le tulaga tonu o le aiga o le Atua ua faavevesi e le agasala. E le gata ina ia faamae’aina atoatoa lelei lenei galuega, ae faapea foi ona ia valaauna le au soo, faamalosiau ia i latou e galulue faatasi ma ia, i le galuega o le faaolataga mo i latou atoa ma isi.

I le faamatalaina o le taunuuga e taunuua iai le soifuaga, sa le’i faama’imauna e Iesu se taimi, e ta’u atu ai ni manatu tetele e le moni, na ia ta’u atu i ē na mulimuli ia te ia, le auala e mana’omia latou te ola ai. O Faaēāea ma le Lauga atoa i luga o le Mauga o loo ta’u mai ai le ituaiga olaga o le soo Kerisiano (Mataio 5:3 – 7:27) E ui ina le talafeagai ma manaoga faa le lalolagi, “Auā o le poto o lenei lalolagi o le valea lea i luma o le Atua” (I Kori 3:19). E manuia se tasi e ola i lenei auala. “O lenei ai sē e faalogo i a’u upu nei ma faia e ia, ou te faatusaina ia ile tagata poto, ua na faia lona fale i luga o le papa... Ai se tasi e faalogo i a’u upu nei, ae le faia, e faatusaina o ia ile tagata valea, na na faia lona fale i luga o le oneone (Mt 7:24, 26).

O LE FAATUSA O LE AUAUNA

E faamatala e Iesu i nisi taimi le olaga o le soo e faatatau i se auaunaga (Mt 25: 14-30, Lk 12:42-48), e lē faapea o le auauna o le atoaga lea, peita’i ane, o loo atagia mai ai se malamalama’aga i lenei matāfaioi. O le (*oikonomos*) auauna o se tasi lea e tuu atu iai e le pule o le aiga le galuega, o le tausiga o fanua ma fale, fuafuaina o ni mataupu, faia ni alaga’oa ina ia tupu tele ma faasoia atu ai nei alagā’oa i isi. O lenei galuega e aofia ai le faatuatuaina ma le faamoemoeina.

O se faataoto i le tau faai’ui’uga o le Evagelia a Mataio (Mt 25:14-30) o loo aumai ai se faapupūlaga i le mafaufau o Iesu, e faatatau i le tagata auauna ma le auaunaga. O se tala “o se tagata na alu malaga” ae na tuu lona tamaoaiga, o ni tupe siliva e faafoeina e auauna e toatolu.

E atamai le faafoēga a le isi to’alua e ala i lo lā faagaluea’ina o le tupe ma maua ai se tupe faasili lelei. I lona toe fo’i mai, na viia lelei i la’ua e le matai ma e na tele lo la’ua taui. Peita’i, o le auauna lona tolu, sa faatalalē, popole ma lē faamaoni, sa ia faama’imauna le oa a le matai, ma e leai ma se mea na maua, na a’oa’i ma faasala o ia.

O tupe siliva o le tala lenei, e faatusa lea i se ioēga tele e ese mai i tupe. O oloa uma faalelalolagi ma le faaleagaga na gaosia ma e ala mai uma i le Atua. E sa’o lea i mea uma o loo maua e le tagata: o meaalofa faaleagaga pei o le faatuatu, faalagolago, ma le alofa, o taleni o le tino ma le mafaufau, mafutaga pele ma le aiga ma uo, o oloa vaaia, o matāti’o le poto ma le tomai o le tagata, faapea le lalolagi. E iai le aso e mana’omia ai e le Atua se ‘oto’otoga o le faa-āogaina taitasi e le tagata, o vaega faapitoa o nei oloa na avatu i le ta’itoatasi.

O le a sua faatatau i le tulaga o le tofiga taitasi o le

tagata. E ese’ese uma aofa’iga na latou taulimaina, e felanulanua’i faapitoa taleni, o ni avanoa, lu’itau, vaivaiga ma malosi’aga, o auala gafatia o ‘au’ aunaga ma le tali atu – e faatali e le Matai sona taui. Na te faamasinoina le ta’itoatasi e tusa ma galuega na latou faia, e tusa ma mea na avatu ia i latou.

E amata Galuega Faa-le-agaga a Sagato Ikenasio i le faamatalaga tonu, o le “ta’iala muamua ma lona faavae,” e fitoitonu ma lea ituaiga olaga. Na ia tusia, ‘o tagata soifua na gaosia ina ia vivii, āva ma auauna i le Atua lo tatou Alīi, ma o le auala lenei e faaolaina ai o latou agaga. O i si vaega i luga o le fogāelele na gaosia mo i latou, ina ia fesoasoani ia i latou, ia maua le taunuuga na ala ai ona faia i latou. O lea, e ao ina ia latou faa-āoga nei vaega pe a fai e fesoasoani ia i latou, e maua ai le faamoemoe i lō latou i’uga, ma e ao foi ona latou faamamao ese mai ia tulaga, pe a fai ma faalavelave ia i latou. O le tatou faanaunauga muamua, ma le filifilia o le tulaga e sili ona talafeagai mo le taunuuga, na alai ona faia i tatou” Sa gaua’i ma le faatauānau Sagato Ikenasio i le galuega faa-aposetolo pei ona iai o ia, sa malamalama lelei i le faaaogaina tatau o mea ia aofia, ma mana’omia ai lo latou faaaogaina e auauna atu ai i isi.

O le a se mea o ta’u mai ai e uiga i tagata faalavelavea soo, e losilosi atu i mataupu o lenei lalolagi? Pe na o se fautuaga e mo i latou, e ta’ita’ina ai i latou e solo-muli ese mai ai i le lalolagi? E le faapenā le silasila iai a Iesu: “A ia outou mua’i saili lona mālo ma lana amiotonu; ona fa’oopooina atu lea o ia mea uma ia te outou.” (Mt 6:33).

O LE TAU I O LE AUAUNA

O tagata o loo taumafai e ola pei o auauna, e fetuuna’i o latou mafaufau poo le ā se taui latou te maua. E le o se manatu faapito ae o se fa’anaunauga vaaia, o le fa’amoemoe Kerisiano. Na aumai e Peteru le fesili ina ua ia fesili ia Iesu, “Faauta, ua matou tu’ua mea uma, ae mulimuli atu ia te oe.” (Mk 10:28).

O OLOA FAA LE LALOLAGI MA LE FAA LE AGAGA NA GAOSIA UMA, MA E MAI LE ATUA.

O le tali a Iesu ua sili atu nai lo le tulaga na fa’amoemoe pe naunau iai Peteru poo se i si fo’i soo:

“E moni, ou te fai atu ia te outou, ai sē tasi ua ia tu’ua le fale, po o uso, po o tuafāfine, po o le tinā, po o le tamā, po o le fānau, po o fanua, ona o a’u ma le tala lelei, e maua lava e ia le ta’isautuaselau i lenei olaga, o fale, ma uso, ma tuafāfine, ma tinā, ma fānau, ma fanua, atoa foi ma sauāga, a o le ola atalī e maua ai le ola faavavau.” (Mk 10:29-30)

Tusa lā o loo faapea mai: o le tuulafoa’i, lona uiga o le a tele vaega e talisapaia, e aofia ai le tele o matāfaioi faa-āuauna, atoa ai ma tulaga e mulimuli mai ai, o le ola i lea ituaiga olaga ole sauāina, ma e ui o le olaga faa soo tala’i ma le ‘au’ aunaga ua tapu’e ai auala tal-

O LE AUALA A IESU (ITULAU 33 – 38)

afeagai o le olaga faa Kerisiano i lenei lalolagi, peita'i latou te maua lo latou taui ato'atoa i le isi olaga.

Amata nei loa i le taimi nei: ‘O le avea ma soo Kerisiano o se ituaiga olaga faamanuiaina, o se auala o se mafutaga faatasi ma Iesu, ma o se faa-a'oa'oga o se auaunaga, o se tasi o vaega o le puna'aga o le loloto o le olioli. O ē ola i lenei auala o ni tagata fiafia ua latou maua le uiga ma le autu o le olaga.

O le au faatuatua lolotu, i se taimi umi lava – o le lē faia o se tala ia i latou e lē faatuatua – sa tauivi ma le fesili poo le ā se tāua e tuu mai i gaioiga a tagata. O se tasi tali o le mafaufau lea i se auala i le i'uga, ia fai nei loa le lelei i le taimi nei mo se taui i le lag. O le isi tali, o le tepa lea i le fesili i le ola atalī: fai le lelei iinei i le taimi nei mo le faaleleia atili o le lalolagi.

O le Fono Lona II a le Vatikano o loo faasino i se tali lona tolu. E vaai i gaioiga a tagata i le tāua o mea ua ia ausia iinei i le taimi nei, ma faapea foi i le la so'otaga ma le olaga atalī. Peita'i e sili atu leā, o loo faamamafa mai, e lē gata ile motusia o iinei ma le taimi nei ma le atalī, ae faapea foi le ofoofogia o le moni o le faa-auau pea lava pea.

O loo iai le Mālo o le Atua i le talatuu faasolopito, e le o atoatoa ona lelei, ae peita'i e moni (Mt 10:7 *Lumen Genitium*, no.48, *Gaudium et Spes*, no39). Ia mautinoa o le a taunu i lona taunuuga i le mana o le Atua, i ana fuafuaga, i lona lava taimi lelei ua 'atofaina. Ma o lea, ona o a latou galuega aoga i lenei olaga, e fai foi e tagata foa'i e faa-tapulaa, ae o foa'i moni faa le tagata mo le fausiaina o le Mālo. Latou te faia ma le manatu e avatu ai le fiafia faapea foi le taunuuga lelei atoatoa o le Mālo faatasi ai ma i latou – o le a fiafia i le olaga o le a oo mai. O le ala lea e a'oa'o ai e le Fono, o le autu o tofiga faa-le- tagata i ““au'aunaga faa-le-lalolagi” i uso tagata i le sa'o atoatoa ina ia sauniuni mataupu o le Mālo i le Lagi.” (*Gaudium et Spes*, no.38).

Ona o Keriso, ua afio atoatoa ai le Atua i le soifua o le tagata ma le talatuu faasolopito. O se tasi ua avea ma soo o Keriso, e leai se faalotolotolu, e mautinoa e le faatu'iese, i le vā o le fauina o le Mālo ma le tautuaina o manatu autu o tagata, pei ona faia e le auaua. O le vaega tutusa lava lenei e tasi o le mea moni – o le mea moni lea, e ta'ua o le olaga Kerisiano.

O le Mālo o le Atua e le o se mālo faa-le-lalolagi, e faaititia pe pala, o le Mālo e faavavau o le ola atalī. Ae o lena “ola atalī” o loo faa'au'aunaga faatasi ma le ola i le taimi nei e ala i galuega lelei, o fa'anaunauga o tagata, o loo tapu'eina e le tagata i le taimi nei. A mae'a ona galuea'ina atoatoa e le tagata, ona faatoatoa lelei lea e le Atua ma faa- taunu le siitia o le tagata. “E iai foi le nofoalii o le Atua ma le Tama'i Mamoe, o ana auaua latou te auaua ia te Ia, latou te vaavaai atu foi i ona fofoga, e iai foi i o latou muāulu lona suafa. E leai lava se po i lea mea, e le aoga foi ia i latou se mōli, po o le malamalama o le la, auā o le Atua na te

fa'amalamalamaina i latou, latou te fai ma tupu foi e faavavau, faavavau lava” (Faaaliga 22:3-5).

Mo Mafaufauga Loloto ma Talanoaga

O a ni uiga lelei i le soifuaga o Iesu e sauniuni ai mo i tatou se tulaga e ao ina ia tatou ola ai? Tusi se lisi o uiga po o amioga nei ma fua iai le tāua o lou olaga ma olaga o lou mafutaga?

Afai e fai sau tautalaga faatatau i auaunaga, o lē fea faataoto a Iesu e uiga i auaua e sili ona e faamamafaina?

O a auala na fai ai e Iesu se faata'ita'iga o se auaua lelei atoatoa?

O le a tonu lava se mea e faatalia e le auaua, e maua mai le Atua i lenei olaga ma le olaga atalī?

O le a se mea e te faia atoatoa i le Mālo o le Atua i le lalolagi, e te sauniuni ai mo le Mālo o le Atua i le lag?

O le a se feau mo oe mai Afioaga Pa'ia a le Atua faatatau i le valaauna ma lu'itau i le savali i ala o Iesu?

“O a'u nei o le vine, o lā outou. O lē tumau ia te a'u, ma a'u ia te ia, o ia lava e fua tele mai, auā e le mafaia e outou ona fai o se mea e tasi pe a'u le i ai” (Ioane 15:5)

Na iai se fefinaua'iga i le va o le au soo faatatau poo ai o latou ua sili. Ua silafia e Iesu fa'anaunauga o ū latou loto, ma aumai ai se tamaititi ma faatu i ona tafatafa, ma faapea atu ia i latou, “Ai sē talia lenei tamaititi i lo'u igoa, ua talia a'u e ia, ai sē talia foi a'u, e sili lava ia”

(Lk 9: 46-48)

“Aua le atuatuvalē ū outou loto, ia outou faatuatua i le Atua, ia faatuatua mai foi ia te a'u. E tele mea e nonofo ai i le fale o lo'u Tamā, ana leai, po ua ou fai atu ia te outou, ou te alu e sauni se mea e nonofo ai outou? Afai foi oute alu ma sauni se mea e nonofo ai outou, ou te toe sau, ou te talia foi outou ia faatasi ma a'u, ina ia i ai outou i le mea oute i ai a'u,” (Ioane 14:1-3)

Talanoa i vaega nei:

O le faatasi ma Iesu ua faatusa i se ituaiga o mafaufauga, o amioga, o le alofa, fesootaiga ma isi, ma le va'aiga i le lalolagi. O se auala o talanoaga e uiga i o tatou faanaunauta'iga e mulimuli ia Iesu, e tosina atu i lana faata'ita'iga, ia a'oa'o mai ia te Ia, ma avatu lo tatou fa'atuatuaga ia te Ia na te fuafua ma faatonutonu. (William Reiser)

O le tagata i le fale i Peteleema o le tagata soifua e iai lona mafaufau, o le loto ma le agaga. Ma o ia o le Atua. O lona soifua e faailoa mai ai le finagalo o le Tamā, na te folafola talalelei pa'ia, na te faaosofia le lalolagi i le mana o le Atua, na te faatū le Feagaiga, ma tauave le agasala a le lalolagi, o faaleleia i le alofa ma taitai le tagata i le leptia o le taulaga, ma le manumalo o le Toetu i le ola fou i le alofa tunoa. I lenei lava taunuuga o loo ta'oto ai le soifua maualuga atoatoa o Iesu, i le faataunuui-

O LE AUALA A IESU (ITULAU 33 – 38)

na o le galuega atoa ma le taunuuga fai to'atasi o
le tasi'aga lava e tasi.

(Romano Guardini)

E ao i Kerisiano, o faimalaga aga'i atu i le nu'u faale-lagi, ona saili ma fiafia i mea o i lugā. E le faaititia lenei galuega ae faatuputeleina le mamafa o le latou matafaioi, e galulue ma tagata uma i le faatuina o se lalolagi e sili atu ona fegalegalea'i tagata. O le upu moni, o le misitelio lilo o le fa'atutuaga Kerisiano, e tapenaina i latou i lu'i aupito lelei ma fesoasoani aga'i i le tatalaina o le uiga ato'atoa o lenei gaioiga, o se uiga e avatu ai tu ma āga'ifanua a tagata lona tulaga maualuga, i le totonugālemu o le vala'auina o le tagata (*Gaudium et Spes*, no.57)

TOFI TIAKONO TUMAU – O LĒ TU ILE VA MA ‘OLE AUAUNA AMATA MEA

Mai tusitusiga a Bridie Stringer – fa'aliliuina e Lauano ILAOA

O lenei tusitusiga ua fa'asoa mai ai le tusitala i nisi o mafaufauga e fa'avae mai i ana sa'ili'iliga mo lona fa'ailogā fa'afomai ole mafaufaufau, e uiga i le tofiga ua au tausagā ona iai, o le tiakono, lea na toe fa'atauaina ma saga fa'atumauina i totonus o le ekalesia i le tauaoifiaga a le Komisi ole Vatikano (Vatican Council). O Bridie Stringer, o se Fesoasoani ole Ekalesia (catechist), ma o ia o se faiaoga i le Iunivesite o Sagata Maria (St Mary's University College), ile a'ai o Twickenham.

(Vaega Muamua)

O nai tausaga e lei mamao tele atu, sa taumafai ai le nusipepa a le Ekalesia, lea e fa'aigoaina ole *Pastoral Review*, e lolomi ma fa'asalalauina atu ia tala ma lipoti atoa ma ai ma ni su'esu'ega, e fa'atatau i le matafaioi a tiakono tumau i totonus ole Ekalesia Katoliko Roma i onapo nei. O nisi o finagalo sa fa'aalia mai i nisi o ia tusitusiga, sa atagia ai lo latou manatu, 'o le tofiga ole tiakono tumau, ua na o se 'au'aunaga', e fa'avae i le fa'auigaina ole fa'amaumauga i le tusi o Galuega a le Au Apostolo Mataupu e 6, ma le tala o lo'o fa'amamafaina ai le muimui o tagata Elenisi ona o le galo o latou fafine ua oti a latou tane, i le 'tufatufaina o mea i aso fai so'o,' ma mafua ai ona filifilia i latou e to'afitu mo lenei auaunaga. O isi foi tusitala e manatu o le uiga moni o le tofiga tiakono, o se tautua e tatau ona iai, ae le tele ni galuega na te faia. E tele molimau e iloa ai, le fenumia'i ma le fete'enai o le vafealoai o tagata i totonus o nisi palisi, ona o le matafaioi ma le auaunaga a tiakono – e manatu tagata aulotu ua filifilia i ni auaunaga i palisi, o le tofi tiakono ua lamatia ai le latou galuega ma le latou foi pitola'au, aemaise le au fa'atuuatua ia e le manino lelei ile taura o lona tofiga i matafaioi fa'a-sakalameta, ma isi e manatu, o le tiakono o se tasi, e na ona alu atu e fa'ataunuu se mea e fiafia iai i sauniga fa'alelotu, i ona taimi avanoa. Ae mo a'u lava ia, o finauga ma mafaufauga nei, na mafua ai ona ou

fia iloa atili ma malamalama i le tofiga tiakono, lea na i'u ai ina avea ma autu o a'u saili'iliga mo le fa'ailogā fomai ole mafaufaufau. O Akiepikopo Robert Runcie, e ona le fa'aupuga e fa'aoea, o le Ekalesia, 'e pei o se vaita'ele, e aupito sili ona pisapisao lona vaega papa'u'. I lo'u fa'aaogāina o le ata lea i le tofiga tiakono, sa ou taumafai ai e sa'ili'ilī i ona itu loloto, ina ia ou iloa ai isi vaega taura o lenei tofiga ua au tausagā, lea na toe fa'amautuina ile taimi ole Vatikano Luu.

O le tusitusiga lenei, ou te fia fa'asoa atu ai i nisi o vaega sa ou maua mai a'u suesuega i totonus ole itumalo Southwark (i totonus o Puleaga e aofia ai Portsmouth, Arundel ma Brighton, Plymouth ma le Pule'aga Fa'a-Akiepikopō a Southwark), ona o le vaega tonu lea i le fa'afanua sa fa'atino ai la'u suesu'ega. Sa vala'auina tiakono uma e to'a 172 i totonus o lenei itumalo tele, e fa'asoa ma talanoa mai, e uiga i lo latou va'ala'auina ile tofiga, o a latou a'oa'oga mo le tofiga, o latou olaga fa'a-tiakono i totonus o le palisi, le a'afiaga o latou tofiga i a latou fa'aipoipoga, ole soifuaga tausi aiga aemaise o galuega ma matata e galulue ai. O le fa'amaoni ma le ato'ato'a o a latou molimau o se tulaga sa fa'afiafiaina tele ai a'u i le tulaga fa'aletagata ma le fa'a-tagata su'esu'e, ma o lea ua mafai ona tu'ufaatasia ai molimau a le 31 pasene o tiakono o le itumalo (53), ia ua silia ile 600 tausaga pe a tu'ufaatasi, ia le umi ole latou auaunaga fa'a-tiakono, amata mai ile tausaga e 1970 seiā o'o mai ile asō.

Ou te fia fa'amamafaina le matafaioi a le tiakono, 'o lē tu ile va', pe a manatu ile molimauina e tagata lotu o lana auaunaga fa'atino mo le au fa'atuuatua, po o le Sauniga ole Eukalisitia ile Aso Sa. O le mafua'aga ua ou filifilia ai le vaega lea e amata ai, ona o le tusitusiga a le Tiakono o Christopher Road na lomia i le nusipepa ole *The Pastoral Review Mati/Aperila 2005*, lea na ia lagā ai 'le tatau lea ona aofia le auaunaga fa'a-tiakono i totonus ole Ekalesia'. Sa ia fa'aalia ai le manatu fa'apea, e mafai ona fa'atino lea tulaga pe afai e fa'a-fa'aipoipo fautuaga nei e lua (1) ole Ekalesia

TOFI TIAKONO TUMAU – O LĒ TU ILE VA MA ‘OLE AUAUNA AMATA MEA

ole Tino o Keriso, o le tino ola ‘e fausia e le Eukalisitia’, ma le (2) o le ‘tofiga tiakono ole Eukalisitia lona amataga ma lona taunu’uga’. O le fa’ aupuga lona lua lea, e si’i mai ile Ta’iala o le Fa’avae o Mea Fai mo le Tofi Tiakono Tumau (9), ma e fa’aaogaina e fa’amamafaina ai, e lē tatau ona fa’aititia le taua ole auaunaga ma le tofiga tiakono, ia tau ‘o se auaunaga lautele’. E foliga mai e laititi lava se mea na faia i totou ole lima tausaga na soso’o mai ai, ina ia maua se fa’atulagana fa’a-telosia, e mafai ai ona maua e le tofiga tiakono le tulaga moni fa’-a-Eukalisitia. O tiakono o le itumalo o Southwark, e manino lelei mai le la’ititi o lo latou tulaga a’oa’oina, ile folafolaina ai Tusitusiga Pa’ia ma tatala le ‘Upu ile taimi o a latou lauga. Peitai, o le tusi e fai ai a’oa’oga e uiga ile Eukalisitia mai le Fono a Epikopō, e igoa ole *With Hearts and Minds* (2005) fa’apea ai ma le tusi na lomia muamua atu e igoa ole, *One Bread, One Body* (1998), e lē o aofia ai ni fa’amatatalaga patino e tusa o le matāfaioi a le tiakono ile fa’asologa o le sakalameta ole Eukalisitia, ae pe iai foi sona sao fa’apitoa e ‘ese mai ai i isi tagata fa’atutau ia e ‘au’aua i isi matata e foliga tutusa ma ia – e pei ole folafolaina ole ‘Upu (faitauga muamua ma le faitauga e lua), o Talosaga Lautele (pe afai e leai se tiakono), ma le tufatufaina atu ole Komunio Paia.

O nisi o tiakono o le itumalo o Southwark, sa o latou fa’ailoa mai i se tulaga o’otia ma le agaga fa’afetai, le taimi o le Misa Sa, lea e fa’amanua atu ai le faifeau (patele), i le tiakono, a’o ia le’i folafolaina le ‘Upu. O se tasi o tiakono na ia fa’ailoa mai, ole taimi sili ona ia lagona ai le taua o lona tofi ma lana auaunaga faa-tiakono, ole taimi lea e to’otuli ai mo le ifoga. Ae o le isi vaega tele o tiakono sa aofia i lenei su’esu’ega, na o latou fa’alia mai, o le latou ‘au’aua naga ile folafolaina ole Upu ile taimi ole sakalameta ole Eukalisitia, ma lo latou fa’afioina atu ole Komunio Paia mai le Sauniga ole Misa Sa mo tagata mama’i ma ē nofo fale, o tulaga aupito i sili ia ona taua mo latou ma a latou auaunga i le tofiga tiakono. Ae mo le lautele o tagata lotu ole palisi, e manatu i latou, o tiute ma matafaioi nei, o ni auaunaga e tatau ona fa’atino, ae le o ni tiute fa’apitoa pe tulaga’ese. O le tulaga’ese ole tofiga tiakono, e le o manino lona faatulagaina mai i totou ole fa’asologa ole sakalameta ole Eukalisitia, ma e lē lautele foi sona fa’amatatalaina pe loloto sona suesuega i a’oa’oga fa’ale-eklesia, po’o aoa’oga mo tofiga e aofia ai le tofiga fa’-a-fesoasoani.

Ole Tiakono i lona tulaga, o lē tu ile va.

O le matafaioi ‘o lē tu i le va’, o se vaega autū lea o le tofiga tiakono mai lava ile fa’ato’ā fa’avaeina o le Eklesia. O le tiakono, o ia lea o le sui ole Epikopō, ma o lana matafaioi, o le fa’aleo ma le fa’ailoa atu ile Epikopō, o mana’oga o tagata lotu, ma o ia foi o le fofoga ole Epikopo ile va feagai ai ma tagata lotu. O le matafaioi lenei mo le tofiga tiakono, sa toe fa’amamafaina ma saga fa’atauaina mai ile tusi ta’iala e igoa ole *Basic Norms*, mo le tofi tiakono e pei ona iai ile taimi nei. Peitai, e tele taimi e masani ona pei ai ua galo ma fa’atutuanā’i iai, e mafua ‘ona ua mana’omia tiakono e fa’atino nisi o auaunaga fa’-a-sakalameta, e mafua mai ile to’agaogao ma le tau leai o ni faifeau. I le su’esu’cina atili o lenei vaega o le tofiga tiakono, e tulai mai ai le fesili, ‘O ai tonu a tagata e ona mana’oga ia e tatau ona fa’aleo ma momoli e le tiakono ile Epikopo?’ E maua le fesoasoani i le tau fa’apupulaina o lea vaega, ile Tulafono 383 a le Eklesia Aoao.

Tulafono 383: E tatau ona tautala e uiga ile finagalo ole Epikopō mo le au Kerisiano fa’atutua uma e i lalo o lana tausiga, po’o le a le matua, ma lona tulaga, ma lona tagatana’u ae pe nefomau i totou ole itumalo pe o se tagata asiasi mai: e mana’omia foi o ia e fa’alautele atu le agaga fa’apostolo mo latou ua le mafai ona maua le fesoasoani masani fa’ale-agaga, ona ole tulaga o lo latou soifuaga atoa ai ma tagata ua lē o toe ō i se lotu.

E sili ona tele fitā ma lu’itau i mana’oga o tagata e nonofo i totou o le li’o ole pule’aga, ae ‘ese lo latou fa’atutuaga (o le auaunaga e tatau ona fa’atino), mo le fa’atutua ma le ola fa’ale-agaga o ia tagata, e auala i le galuega a faifeau, po’o palisi o le latou fa’atutuaga, po o se sui filifilia o le Epikopō.

E mana’omia foi lona galue ma le ato’ato’ā i tulaga masani ole soifuaga atoa ma le agalelei atu i uso ma tuafafine, e lē o ni sui ato’atoa ole Eklesia Katoliko, ma ia taumafai e fa’ailoa atu iai le talalelei, e tusa o a’oa’oga a le Eklesia.

Ma le vaega mulimuli, e tatau ile tiakono, ona ia manatua lelei tagata lē papatisoina ua latou feagai ona o le galuega a le Alii, ina ia fa’apea ona susulu atu iai le agalelei o Keriso, e pei ona molimauina e lana auauna Epikopō.

O le to’aititi o faifeau fa’auuina ole eklesia, e tula’i mai ai le fesili, pe fa’apefea ona fa’amalieina e Epikopō mana’oga o ituaiga tagata ‘ese’ese nei, ao feagai ai ma le tausiga o mana’oga masani fa’-a-sakalameta o le au fa’atutua ole Eklesia? E fa’apefea ona fa’asoa alamanuia mo galuega fa’-a-evagelia ma galuega tala’i mo tagata e le o ni sui auai o aulotu. O le taumafai e fa’atino ma fa’auau pea auaunaga fa’asakalameta, ile vaitaimi ua matuā fa’aititia ai le aofa’i o faifea’u fa’au’uina ole eklesia, ua maua le fesoasoani fa’atapula’aina ile auaunaga a tiakono, ile fa’atinoina o Papatisoga ma le Komunio Paia. E fa’aoopoopo atu iai lo latou faia o fa’amanuiaga o fa’apoiopoga ma faia sauniga o falelauasiga o maliu, ae le mafai ona latou osia ni Misasa, pe ta’ita’ia se Sakalameta ole Fa’aleleiga po’o le Sakalameta ole Fa’amalologa o Ma’i. O tiakono lava ia ole itumalo o Southwark, o le latou auaunaga, e mafuli i le itu tau i sauniga lotu ma lagolago i sakalameta, ae lē a’afia i ni tala’iga ma ni polokalame lautele mo tagata ua i tuāpā ole eklesia. O le a faigofie tele ma lē fetau pe afai e fa’apea ane se manatu, o le a’oa’oina ole ‘Upu, sakalameta atoa ma galuega ole alofa, e lē aofia i le latou matafaioi. Ae ui o lea, e taua tele ona silafia po’o a tonu vaega ole auaunaga a le tofi tiakono ia ua aloaia ile taimi nei ina ia fa’atosina ai tagata ma filifilia ma a’oa’oina i latou mo lenei tofiga. O meaalofa ma tomai mana’omia mo le aufaigaluega e feagai ma tagata lautele aemaise i latou ua fa’aletonu lo latou soifuaga fa’ale’atutua, atonu e ‘ese mai i tomai ma agava’ā mana’omia mo le aletale po’o le pulela’ā, lea e matua taua ai le sa’o lelei o le fa’atinoina o le fa’asologa o tapuaiga. E foliga tutusa lea ma e galulue mo tagata mama’i, ma e o feagai ma ni mafatiaga aemaise o e fa’anoanoa ona o le malaga a le maliu ma le oti, ona e le tutusa lo latou mautinoa pe a feagai ma tiute tau sauniga lotu e pei ole faia o se lauga. E ono afaina ma lē lelei le fa’aaoga o tiakono mo galuega fa’afafeau ona ole to’aititi ma le to’agaogao o le aufaigaluega pelepitelo, ona o le a lē mafai ai ona ato’ato’ā le fa’atinoina o nisi o matafaioi ole tofiga, ia e na o le tiakono e lelei ma atoatoa lona malamalama iai. O le Sakalameta ole Fa’asolo-

TOFI TIAKONO TUMAU – O LĒ TU ILE VA MA ‘OLE AUAUNA AMATA MEA

ga,e na ole tiakono e iai le avanoa e molimau ai i totonu o le mea e galue ai atoa ma le soifuaga masani o tagata lautele, ae lē maua lea avanoa e se faifea'u po o se Epikopō. O tiakono e mafai ona umia ni tofiga lautele fa'ale-malo,ma ole avanoa lelei lea e mafai ai ona ia finauina mana'oga o tagata o loo fia maua se fesoasoani e fai ai o ia ma sui ole Epikopo ma le ekalesia o galue ai.O mana'oga ia e mafai ona fai ma fa'ataitaiga ile taimi ole Sakalameta ole Eukalisitia, ma fesoasoani ile fa'atinoina ole molimau a le au fa'atuatua i galuega fesoasoani mo tagata lautele.

(Fa'aauau ile lomiga e soso'o ai)

MAFUTAGA TINA MA TAMA'ITA'I KAPELENISIA SAMOA

E vi'ia pea le agaalofa ma le agalelei o le Tama i le lagi on a lana meaalofa o le soifuaga ma le ola.

Ae avea ia lenei avanoa e fa'aleo atu ai sa mataou fa'afetai e ala i le tatou fa'amoemoe pei ona iai le Aso To'ona'i aso 11 Me, 2019.

E muamua ona ou momoli le agaga fa'afetai i afioga i le Ituaiga Sa. Afioga Patele Maleko Api Tufuga, Afioga Patele Anitele'a, Afioga Patele Joseph, mo le tapenaina o matou tina e ala i saunoaga ma tima'iga fa'alaei'au e tapu'e ai lo matou olaga fa'atina. Aemaise le Misasa sa fa'ai'uina ai tapenaga fa'aleagaga.

12

Lau afioga Sala Mika le ta'ita'i o le tatou Kapelinisia Samoa, le afioga i le ta'ita'i fono, lau tofa Tauloa, o nai tama sa outou tapua'ia lo matou fa'amoemoe, fa'afetai tele lava.

Fa'afetai tele i le Ekalesia Sagata Ana mo lo outou mafuta mai ua saga matagofie ai le fa'amoemoe.

Fa'afetai i teine o le SMOGA mo le tapenaina o le malumalu fa'apea fo'i le to pese mo le Misasa ia Koleta.

Fa'amalo i le Losalio ma le tatalo a le Fa'atina o le mafutaga a Tina ma Tama'ita'i, le faletua ia Ita Kasiano.

Fa'amalo i le tapuaiga Peresitene ma o outou ofisa, tapa'au ma aiga ma e tino i matutua o mafutaga ta'itasi. Fa'amalo i la outou tapuaiga ua matou malolosi ai.

E le fa'agaloina fo'i le lagolago malosi a le Peresitene ma le Ekalesia i Petone, lau tofa Tolu Aukusitino Smith, fa'apea le tatou D.J. Fa'amalo Fa'afetai !

O e uma sa gapatia i le tapenaina o le tatou fa'amoemoe, fa'amalo ma fa'afetai i la outou lagolago.

Matou te talitonu fo'i e le 'asa lava lea ma so matou fa'aletonu. Matou te talosaga atu ai ma le agaga maualalo e fa'amalo so matou fa'aletonu.

Soifua o na o Iesu
Ofisa o le Mafutaga a Tina ma Tama'ita'

Kolotita Fa'aete'ete
Tafale Asiata
Telesia Alaimoana
Mufua Smith

TULIMANU O AOGA ASO SA

E fa'atalofa atu i le pa'ia ma le mamalu o le tatou Kapelinisia Samoa i Ueligitone nei. O le A'oga Aso Sa lenei a Sagata Ana mai Newtown, le Palisi Ueligitone i Saute. O si a matoi A'oga Aso Sa, e ausage lava, ae o le mea e sili ona taua ia te i matou, o le fiafia ma le naunauta'i o Alo ma Fanau, aemaise le lagolagosua o matua, e ala i lo matou galulue fa'atasii. E

TULIMANU O AOGA ASO SA

talitonu le fa'amoemoe ma le mafaufau, o le mea o lo'o iai le finagalo o le Atua, e faigofie ona fa'agalueaina lona fa'atina. O le fa'amoemoe maualuga lava, o le mana o le Atua e ala i lona Agaga Paia, e fa'aa'upegaina auauna vaivai i le poto ma le atamai, e fa'ataunu'uina ai lenei auaunaga. O le naunauta'iga lava, ia matou aoga i le galuega ma le finagalo o le Atua, e ala i lo matou faimalaga fa'atasi ma Alo ma Fanau i lo latou soifuaga fa'aleagaga i lenei olaga le tumau.

O le aofa'iga o Tama ma Teine, e to'a sefulu ma le tasi i le taimi nei. E mai le fa e o'o i le sefulu ma le ono tausaga, ma ua vealuina nei i vaega e lua, Junior ma le Senior e fua lava i Faiaoga.

E ui lava la ina ausage i matou, ae fa'afeta i le Atua e ala i matua, i lo latou naunau e una'i mai Alo ma Fanau, ua mafai ai ona iai le Aoga Aso Sa a Sagata Ana.

E talitonu ma le faatuatua,, o le galulue ma le filiga ma le fa'amaoni atoa ma le fiafia, o inā o lo'o lotolotoi ai le Atua ma i tatou. Manuia taualumaga o lenei tausaga ma ona la'asaga ae ola Sagata Ana i le alofa ma le agalelei o Iesu le Agaalofa Mamana.

St Anne's Church Newtown Samoan Sunday school community offers children of all ages the opportunity to learn more about the church, our beliefs, protocols and provides a family environment. Although it may seem like a drag going to school on a Sunday, it is not – we are taught in both English and Samoan. Sunday school focuses on the Christian culture in compliance with the divine commands of both the Old and New Testaments and the conversion at its peak and work of the Holy Spirit. Sunday school teaches about the Catholic teachings of the scripture and the aspirations from the message of Christ, to live, to be like, to learn, to share with others and embrace our faith wholeheartedly.

From Melania Jahneva Lui-Fai

O FAFINE O LE EVAGELIA ANA VA'AVA'A MA FA'ATALITALI *Faitau muamua - Luka 2: 22 – 38*

Na olaina e Ana se olaga umi o le fa'atalitali ma le fa'amoemoe. Ua foliga ua ia faia se galuega tele o le onosa'i ma le fa'atuatua. O le mafua'aga lenā na ia iloaina le Mesia, e ui na sau i se tulaga o se pepe, le alo o se ulugali'i matitiva, o Maria ma Iosefo. Na si'itia e Luka le maualalo i le pa'iaga i le fa'amatalaga a Ana le perofeta, ina ua va'ai atu iā Iesu ma e ui na te le'i mafafia ona faia se mea, ae sa fa'ailoa atu iā i latou uma o lo'o fa'atalitali le Fa'aola o lea ua sau. O Iesu, o Lē o le a lavea'ia Ierusalem ma le lalolagi, ua sau, e ui na iloaina e le 'au fa'atuatua o le a sau.

Atonu sa va'aia e le lalolagi e le'i olaina e Ana se olaga taūa. O nisi o taimi e manatu tagata o le fa'atalitali ua na o se pi'ilima ma fa'apasi o le taimi se'iia tupu se mea taūa tele. E le o se fa'amatatalaga sa'o lea e talafeagai mo Ana, e sili atu pe a fa'atusatusa i se fasfine ma'itaga o lona olaga atoa ua aga'i i le mea o lo'o tuputupu ma olaola ma sauniumi. O Ana o se fasfine o vaitau uma. Atonu sa fa'aipoipo e pei o le aganu'u i na vaitau, ae na fa'aletonu uma o na fuafuaga ina ua maliu lona toalua i le fitu o tausaga talu ona fa'aipoipo. E aunoa ma mata o le fa'atuatua, masalo se manū ua fa'agaloina ma tu'uina atu i se faiga o le a galo atoatoa ai.

Ae o lana fa'atuatua i le Atua sa ola lelei toe malosi. Sa fa'afailele ona fa'amoemoega i le talitonuga naunauta'i, mate-laina ma tatalo "i le po ma le ao" (2: 37). Sa fa'aaauau pea lona talitonuga i le Atua, 'i lenā ituaso ina ua taunu'u o ona matua e momoli mai lo la alo, Iesu, i le Malumalu, na fa'atalitali Ana ma matamata. Na iloa lelei e ia o Iesu o le Mesia, e pei o lona olaga atoa sa fuafua mo lenei feiloa'iga. Sa le fa'atali loa ae folafola atu lona taunu'u mai o le fa'ataunu'uiga lea o ona fa'amoemoega uma ma talataloga a latou uma o le 'au fa'atuatua i Ierusalem. Ona tautala mai lea iā i latou e fa'atuatua i ia, fa'atuatua i folafolaga a le Atua o le a sau le Mesia. Ina ua sau, o Ana ma isi o le 'au fa'atuatua e matitiva ua iloaina ua suia o latou olaga e fa'avavau ma o la latou onosa'i ua tauia.

Na tonu lava lo latou talitonuga.

O le Evagelia a Luka ua talatala maia se faigamalaga i Ierusalem. Mo le tapenaga mo le faigamalaga, sa tu'umuli atu Iesu i Nasareta i Kalilaiia. O lana faigamalaga o le a toe fa'afō'ia maia o ia i Ierusalem le nofoaga na amata uma ai, e pei ona tatou iloa maia i le tala a Ana ma le Molimoliga i le Malumalu. Ina ua toe fo'i mai o se tagata matua ma feagai atu i le maliu, o le ulufale atu o Iesu i Ierusalem ma faia ai lea e ia le tagiauē ase tasi o perofeta i le 'a'ai na leiloaina le taimi o le asiasiga (Luka 19: 41 – 44).

Ae e le masalomia na i ai nisi sa latou iloaina o ia e pei o Ana na talitonu ma avea ma molimau iā ia i isi. I le taimi o lona pasio, le "fafine o Ierusalem," mo se fa'ata'ita'iga, sa ta'ita'i le "to'atele" o le 'au fa'anoanoa, e pei ona fai mai ai Luka, na iloaina le tu'ua'ia ma le maliu o Iesu o se fai mealētonu o le a tagi ae i le lagī aga'i i tagata ma tu'uina atu i latou uma i le fa'amasinoga a le Atua (Luka 23: 27 – 31). Ua foliga mai na fa'alogi na fasfine i le perofetaga a Ana e uiga iā Iesu, ma latou fusi maia ma avea o ia o lo latou tinā fa'aleagaga ona o ia na mua'i fa'ailoa le folafolaga na fa'ataunuina iā Iesu i le fiafia ma le fa'atuatua. Ina ua toetū o ia, sa poloa'ia e Iesu latou na mulimuli atu iā te ia ia fai i latou ma ana molimau "amata mai i Ierusalem" (24: 47) ma ga'i atu i le "tulu'iga o le lalolagi" (Galuega 1: 8). O le tala o le fa'amaoni a le 'au so'o i fa'atonuga a Iesu na amata iā Ana, le perofeta na mua'i fa'ailoa le taunu'u mai o Iesu i Ierusalem.

O Ana o se fa'ailogi o le ola ma le taūa o le mataala ua mafai ai e ia ona vave iloa Iesu o le Mesia ma fa'avave loa ona fa'ao'o atu lea iloa i isi. O Ana ua fai ma sui o Israuel atoa i le fa'asoa atuina o lenei malamalamā i isi. O Ana ua fai ma sui o Israuel atoa a o ia fa'atalitali mo le fa'aolataga a le Atua na folafolaina e perofeta. E pei o Israuel, o Ana, e lē malosi toe mativa, e lē mafai ona faia se mea mo ia lava. Ae na fa'atalitali i le fa'atuatua ma talitonu. Sa ia saunia o ia lava i

tatalo ma le anapogi. O lona olaga o le onosa'i ma le fa'amoemoe sa tauia ina ua fa'aali Iesu iā te ia, ma sa ia iloaina ina ua o'o mai le taimi o le fa'aaliga a le Atua. Sa le mailoaina pe fa'apefea, sa talitonu o le pepe na momoli mai e ona matua i le Malumalu o le a lavea'ia le lalolagi.

I le sosaiete fa'apateliaka, o fafine o mea totino a ali'i e pei o ni oloa po'o ni fanua, o vitua o suli ia o le 'au matitiva, latou ua le amana'ia, ma latou e leai ni aiā tatau. E masani e mana'omia e fafine le puipuiga mai iā latou tamā, ta'ito'alua ma fanau tama. Ae i le taimi e leai ai i latou ia, ua fa'atonuina e perofeta tagata ma a latou ta'ita'i e fai ma sui o le Atua e puipuiga i latou ia. O vitua ma tamaiti e leai ni matua o fa'ata'ita'iga lelei ia o latou ua leai se malosi'aga. O latou fo'i ia o molimau ola o le tagata e fa'alagolago le tasi i le isi, tatau te mana'omia le tasi ma le isi, ma tatau te va'ava'ai ma tausi atu i isi.

O aso nei ua i ai isi vaega fa'asosaiete ua suia ai le manatu fa'atusi pa'ia o "vitua," (fafine ua maliliu a latou tane), e pei o tagata e i ai ni fa'aletonu o le tino, leai ni aiga, tamaiti e le'i fananau mai, ma latou ua fa'asolosolo ona maliliu. Ona o tatau o le 'au talitonu, e ao ona tatau lagonaina la latou tagi mo se lagolagosua, fai meatonu, puipuiga ma le fesoasoani mo latou. Na tautala Isaia mo le Atua i le fa'amasino atu i nei tagata:

Ua outou fa'aloaloa mai outou lima,
e 'alo 'ese ou mata iā te outou;
e ui lava ina outou fa'ateleina tatalo,
'ou te lē fa'alogeo ai lava;
Ua tūtūmu o outou lima i le toto.
Inā fafano ia outou, inā fa'amamā ia outou;
Fa'ate'a 'ese ia a outou galuega leaga i o'u
lima,
Sōia tou te fai mea leaga.
Ia outou fa'amasani i le amio lelei,
Sa'ili'ili ia i le fa'amasinoga;
ia outou fa'asaina lē ua sauāina,
ia outou fa'amasino i lē ua mātuaoti,
ia outou finau mo le fafine ua oti lana tane.
(Isaia 1: 15 – 17).

Ae o se taimi mulimuli ane na tu'ua'ia e le perofeta le aloali'i a tagata ona o le lē fa'alogeo i le Atua. Fai mai Isaia, "O ou ali'i sili e vaogatata'i latou, e fefā'auō ma ē gaoi.../Latou te lē fa'amasino i lē ua mātuaoti/ua lē o'o atu fo'i iā te i latou le finauga le a fafine ua oti lana tane" (1: 23).
Na folafola mai e Ieremia e ui lava ua fa'asalaina isi tagata ona o a latou agasala, o tamaiti matuaoti ma vitua o le a fa'asaoina, ma o la latou talitonuga i le Atua o le a fa'asaoina mai. Fai mai Ieremia, "Inā tu'ua ia au tama ua aumatua, ou te fa'aola iā te i latou; ia fa'atuaatua mai fo'i iā te a'u ou fafine ua oti a latou tane" (49: 11).

Tatou tomanatunatu i olaga natia a Ana ma su'esu'e ona tau. Pe fa'apefea ona avea ma 'au'aunaga e te faia? Tomanatunatu fo'i i le o gatasi o fafine ua oti a latou tane i le Evagelia a Luka: Ana, o le vitua mai Naina, o le fafine sa fa'atauanau i le fa'ata'oto, ma le vitua na fo'ai ni tupe siliva se lua. O a ni mea e tutusa ai nei fafine? O a mea e 'ese'ese ai? O le a sou manatu i se va'aiga a Iesu iā i latou ia?

Ina ua ia alu atu i le 'a'ai ua ta'ua o Naina, o ona so'o ma le motu o tagata e to'atele na malaga fa'atasi ma ia. A o aga'i atu i le faitoto'a o le 'a'ai, se tasi o ali'i na maliu o lo'o fata mai. Ua na o ia le tama a lona tinā, ma o ia fo'i o se vitua; ma na fa'atasi mai ai ma ia o se motu tele o tagata mai lea 'a'ai.

Ina ua silasila atu le Ali'i i le fafine ma fai atu, "Aua e te tagi." Ua maliu ane o ia ma pa'i atu i le fata ona tūtū ai lea o latou o lo'o amoina mai le maliu. Ona ia fai atu ai lea, "Le taule'ale'a e, ou te fai atu iā te 'oe, Inā tula'i ia!" Ona nofo mai ai lea o le taule'ale'a ma amata ona tautala mai, ona avatu ai lea e Iesu o ia i lona tinā. Ona matata'u ai lea o i latou ma vivi'i atu i le Atua, ma fai mai, "ua tu mai iā tatau le perofeta sili" ma "ua asiiasi mai le Atua i lona nu'u!" Ua so'o lava Iutaia uma ma le itū uma i lenei tala iā te ia (Luka 7: 11 – 17).

(Faitau Luka 18: 1 – 8. 21: 1 – 4)

O le aogā o le anapogi.

Sa tatalo Ana i le po ma le ao ma anapogi. O se tusitusiga lenei mai iā Pope Penetito XVI e uig i le taūa ma le uiga o le anapogi tatau te manatunatu i le taūa ma le uiga o lo'o i ai mo tatau Kerisiano i le fa'aanapogi o tatau lava i se mea e lelei toe aogā i le tausiga o o tatou tino. O le Tusi Pa'ia ma le tu masani Kerisiano o lo'o a'oa'o mai o le fa'alāina e fesoasoani tele i le 'alo 'ese mai agasala ma mea uma ua ta'ita'ia i ai tatou. Mo lenei mafua'aga, o le tala'aga o le fa'aolataga ua tumu i taimi ua vala'auina ai e fa'alaina... I nei aso o le fa'alaina ua foliga mai ua mou atu se vaega o lona uiga, ma ua suia, e se aganu'u ua fa'ailoa i le sa'ilia o mea fa'aletino ma le ola lelei. O le fa'alaina e maua mai ai fo'i mea lelei mo le ola fa'aletino, ae mo le 'au talitonu, o le fa'amuamua e "fōfō" e fa'alelei ai mea uma e ave'esea ai i tatau mai le finagalo o le Atua. O le tausiga lelei o le fa'alaina, o le fa'ataunu'uina lea o le tu'ufa'atasia o le tagata atoa, tino, ma le agaga, e fesoasoani e 'alo 'ese mai le agasala ma ola ai fa'atasi ma le Ali'i... O le te'ea o mea'ai fa'aletino, o lo'o fafaga ai o tatou tino, ua fafaga ai se fa'alogoga i totolu o tatou ina ia fa'alogeo ai iā Keriso ma fafagaina e lana upu lavea'i. E tauuala mai le fa'alaina ma tatalo, ua tatau fa'aulufale mai o ia e fa'amalie se fia'ai loloto ua tatau fa'alogoina i le loloto o tatou tagata. E le gata i lea ole fa'alaina o se fesoasoani lea e fa'apupula ai o tatou mata i le tulaga o lo'o ola ai le tele o tatou uso ma tuafafine. I lana tusi muamua na apoapoa'i mai ai Ioane: "O se ua i ai se 'oa a le lalolagi nei, pe a iloa atu e ia lona uso ua mativa, 'ae punitia lona loto alofa iā te ia, pe fa'apefea ona o le alofa i le Atua i lea tagata?" (Ioane 3: 17). O le ofo e fai fa'alaina ua mafai ai ona tatau ola i le agaga o le Samaria Agalelei, na ifo i lalo ma alu atu e fesoasoani i lona uso puapuagatia (Deus Caritas Est, 15). I le faia o ni galuega sa'oloto o le tineia o le tagata lava ia ona o le isi, ua tatau faia se fa'amatalaga o o tatou uso ma tuafafine o lo'o i ai se mana'omia e lē o se tagata 'ese. – Pope Penetito XVI, *Fe'au mo le Fagafulu*

E le na o Ana na va'aia Iesu i le Malumalu. O Simiona o se ali'i "amiotonu ma amioatua" sa fa'atalitali atu o ia i le fa'amatfanafanaina o Israaelu" (Luka 2: 25). Ina ua va'ai atu o ia iā Iesu o fa'atasi ma Maria ma Iosefo, sa aveina le pepe i ona lima ma vivi'i atu i le Atua. O lana tatalo, e ta'ua fo'i o le *Nunc Dimittis po'o le pese o le fa'ata'apeina* o le pese masani o le evagelia mo tatalo i le po po'o Sauniga a le Ekalesia i le Itula. O upu mai le Latina, o lona uiga: "O lea ua e fa'ate'a i lau 'au'auna, le Ali'i. E masani fo'i ona fai pe a malolo i le po:

Le Ali'i e, ua e tu'uina mai lau 'au'auna e alu i le filemū;
O lau upu ua fa'ataunu'u.
Ua va'aia e o'u mata le fa'aolataga
Ua e sauniunia i le va'aiga a tagata uma,
O se malamalamā e fa'aalia ai oe i nu'u uma ma le mamalu o lou nu'u, o Israaelu.
Fai mai Mother Teresa ua Fa'amanuiaina – e fa'apefea ona

tāaofai lou olaga o se so'o o Keriso? O le a se gaioiga fa'apitoa e mafai ona e faia i lenei vaitau e va'aia ai se tasi o fua nei i lou olaga?

O fua o le paganoa o le tatalo
O fua o le tatalo o le fa'atutaua
O fua o le fa'atutaua o le alofa
O le fua o le alofa o le 'au'aunaga
O le fua o le 'au'aunaga o le filemū.

FAITAUGA MO LE MASINA O IUNI – 2019

ASO 2 IUNI ASO SA – AFIO A'E O IESU I LE LAGI:

Faitauga muamua: Galuega 1: 1 – 11. Matua: Se a le mea tou te tutū ai, ma va'ava'ai i le lagi? O Iesu ua aveina a'e i le lagi.

Salomo: 47: 1 – 2 (tali), 5 – 6 (tali0, 7 – 8 (tali). Tali: O lo'o afio a'e le Atua ma le alaga fiafia, o lo'o afio a'e le Ali'i ma le leo o le pū.

Faitauga lona lua: Eperu 9: 24 – 28; 10: 19 – 23. Matua: Ua ia fa'anofo iā te ia i lona itū taumatau i mea o i le lagi.

Aleluia, Aleluia...ia outou o atu e fai nu'u uma lava ma so'o; 'ou te iā te outou i aso uma lava e o'o lava i le gata'aga o le lalolagi...Aleluia.

Evagelia: Luka 24: 46 – 53. Matua: Ua o'o ina o fa'amanuia ia iā te i latou, ua si'itia i le lagi.

Tofitofiga o le Upu:

Ua amata e Luka lana evagelia ma le Tusi o Galuega i se fa'atomuaga o lo'o ia fa'amatala manino mai ai lona mafua'aga na tusia ai, ma i lenei fa'atomuaga o lo'o fa'amamafa mai ai le fa'aaauauna o lana tala. E le masalomia e le fiafia i le 'aula na fa'atulaga ai le vavae 'ese'ese ai o tusitusiga a le Feagaiga Fou ua le tu'u fa'atasia ai ana galuega ia e lua e manino ai le fa'aaauauna. Ae ui i lea o le Tusi o Galuega e tatau ona faitauina o se fa'aaauauna o le evagelia a Luka. O le tele ia o mea na faia ma upu a Iesu i le evagelia e tutusa ma mea na fai ma upu a ona so'o i galuega mulimuli mai; i le va o mea e uiga i le mana o Iesu i le evagelia, ma mea o lo'o fa'auiga i le mana o le Agaga Pa'ia i le Tusi o Galuega. Mo Luka la, o le Afio a'e o Iesu i le lagi e lē o se muta'aga po'o se malologa, ae o le feso'ota'iga, na ia tu'uina ma le mautinoa i le amataga o le Tusi o Galuega (Faitauga muamua) ma le i'uga o le evagelia, ina ia maua lelei lea tulaga. O le Afio a'e i faitauga ta'itasi nei o lo'o manino le so'otaga i le auina atu o so'o, ona ua si'itia le Ali'i, e ao i le 'au so'o ona o atu 'i tulu'iga uma o le lalolagi.' Ma o lo'o tumau pea le poloa'iga lenā a le Ekalesia.

Mo lē na tusia le tusi i Eperu o le gaioiga e lē na o Keriso, ae mo tatou fa'atasi ma ia: 'e ala ile toto o Keriso ua tatou maua ai le aiā tatau e ulufale atu ai i le malumalu.' Iā Keriso la, o lo'o fa'aaauau e le 'au fa'atutaua le gaioiga a Keriso, o le malosi ua fa'avaaina iā Iesu ma ua faia ma moni mo latou uma e mulimuli iā te ia. E faigofie ona manatu sesē i le Afio a'e o le i'uga o se taimi (le taimi o Keriso) ma le amataga o se isi taimi (taimi o le Ekalesia); afai e fa'apea o le a motusia ai le taūa atoa o le fa'aaauau – lea na amatalia iā Keriso ma o lo'o fa'aaauau iā Keriso.

15

Metitasio Aso Sa 2 Iuni 2019 O le tatou talitonuga

O ia na faia le lagi ma le lalolagi
Ma faia ma tagata i le amataga,
O ia na folafolaina e ala i le tulafono ma perofeta,
Na liutino tagata mai le Taupou,
O ia na tautau i luga o le la'u,
O ia na tanumia i le eleele,
O ia na toetu a'e mai le oti,
Na afio a'e i le mauluga o le lagi,
O lo'o afio i le itu taumatau o le Tamā,
E iā te ia le mana e fa'aola ai mea uma,
Na ala mai ia te ia galuega a le Tamā mai le amataga ma
le fa'avavau.
O ia o le Alefa ma le Omeka,

O le amataga lea ma le gata'aga,
Le amataga e lē vale ma le i'uga e lē mafā'amatalaina.
O le Keriso lea
O le Tupu lenei
O Iesu lea
O le Taitai'au lenei
O ia o le Alii
O ia lea na toetu mai le oti
O ia lea o lo'o nofo i le itū taumatau o le Tamā
E tumau ma le Tamā ma fanauina e ia
E iā te ia le vi'iga ma le mana e fa'avavau. Amene

FAITAUGA MO LE MASINA O IUNI – 2019

ASO 9 IUNI ASO SA O LE PENETEKOSO:

Faitauga muamua: Galuega 2: 1 – 11. Matua: Ua fa’atumuina i latou uma i le Agaga Pa’ia, ua afua ai ona tau-tala i gagana ‘ese’ese.

Salomo: 104: 1, 24 (tali), 29 – 30 (tali), 31, 34 (tali). Tali: E te auina atu lo’u Agaga, e te toe fuataiina fo’i le fogā’ele’ele.

Faitauga lona lua: Roma 8: 8 – 17. Matua: O le Agaga e to’atasi na papatisoina ai i tatou uma i le tino e tasi.

Aleluia, Aleluia...Agaga Pa’ia e, afio mai ia, ia fa’atumuina loto o au ‘au’aura, ma tutu i ai le afi o lou alofa... Aleluia.

Evagelia: Ioane 20: 19 – 23. Matua: Fa’apei ona auina mai a’u e le Tamā, e fa’apea fo’i ona o’u auina atu outou; ia outou talia le Agaga Pa’ia.

Tofitofiga o le Upu:

O lo’o i ai ni faitauga e ‘ese mo Misasa mo le Penetekoso, mo nofoaga o lo’o patipatia ai le Misasa i afiafi. Atonu o nisi ia o fa’afitalui mo le tapenaga i palisi, o se avanoa e tatala ai le ‘oa mai faitauga mai le Feagaiga Tuai o lo’o aumaia se isi va’aina i le sulufaga o lo’o fa’amanatu i le asō: le tala i le olo i Papelu (le agasala na mafua ai le fe’ese’esega), le fa’aliga a le Atua i le Mauga o Sainai (na fa’aali le Atua ma fa’ailoga ma le matagofie), O Ivi Mamago a Esekielu lea na oti ae ua toe fa’aoia mai (mānava) a le Atua ma le sasa’at u o le Agaga mai le perofeta o Ioelu ua mafai ai e tagata uma ona maua le meaalofa a le Atua. O nei mea uma ua au-maia se avanoa mo ni tomanatuga malamalamā i le meaalofa a le agaga i le ola o le Eklesia.

O le faitauga mai le Galuega ua fa’amanino mai ai le a’afiaga o le meaalofa a le Agaga i so’o o lo’o tala’i, o latou uma o lo’o fa’alogologo ua lagonaina le fe’au lava e tasi – e ao i le ‘ese’esega o gagana. O le mea taūa e lē o le vavega, ae o le Tasi o le Tala Lelei ma o tagata uma lava po’o le ā lava le tulaga ma le nofoaga ua vala’auliaina e fa’alogologo i ai. O le evagelia e ao ona fa’auigaina ma tu’u atu i ‘auala ‘ese’ese, ae o le evagelia lava e TASI.

E aogā le maitauina o le evagelia o le asō ua fa’atulaga i le Aso Sa o le Eseta – ona mo Ioane o le aso o le Toetū na tu’uina atu ai e Iesu le Agaga. Ua fa’amanatu mai ai iā i tatou o le 50 o aso e fa’amanatu ai le Eseta e lē o le patipatia o se piriota po’o se mea na tupu, ae o le mana’omia o se taimi e tausisia lelei le moni o lo’o i ai nei – le Toetū o Iesu ma le sasa’at mai o le Agaga i le taimi nei.

Metitasio Aso Sa 9 Juni 2019

Le afimumu o le Agaga Paia

Pe a tatou tilotilo ia i tatou lava ma iloaina ai se malosiaga ofoofogia e pei o lenei afi, o le Agaga Paia lea, tatou te matua’i onanā i le alofa i lo tatou Atua Foafoa ma o le a tatou matuā leiloloa atoatoa ai. Tatou te ola e peiseai ua tatou feoti, tatou te lagonaina i totolu o i tatou lava le noa i le alofa ma leai se lagona fa’amatelieina fa’ameaola, talu ai ua uma ona fa’atumuina o tatou manatunatuga i le alofa mo lo tatou Atua Foafoa. I lo tatou malamalamā’aga e lē a’apa atu e va’ai pe pipi’imau foi i se isi mea na faia e ese mai le Atua, ae na o le va’ai ma malamalamā i lo tatou lava lē aogā ma le agalelei o le Atua ia i tatou. Ma ua tatou iloa i lenei agalelei lē fa’atuāoia e lē manao i se mea sei vagana ai lava mea lelei mo i tatou.

O lea ua avea lo tatou alolofa i le Atua ma mea ua atoatoa, talu ai tatou te lē toe taofi pe malamalamā i se mea ae ua na o le Atua lava. Ma ua leai foi se taofiga i ala vave o le manao. Tatou te ola saoloto ma lē taofiofi, auā ua tatou vavae’ese ma lafoaia mea mamafa uma e ono fa’alavelave i le tatou folaua. Ma ua tatou amo fa’atasi ma Keriso, lea tatou te alolofa ai ia i tatou lava ona o le Atua, ma le Atua mo le Atua, ma o tatou uso-a-tagata mo le Atua. O lenei atoatoaga...ua vala’auliaina oe. Ua tosina mai oe e le Agaga Paia mai le olaga fa’alelalolagi, ua fusia i le fusi o le usiusitai paia moni, ma taitai atu ai e talisua i le meli i le togala’au o le Eklesia paia.

FAITAUGA MO LE MASINA O IUNI – 2019

ASO 16 IUNI ASO SA O LE TASITOLU PA'IA:

Faitauga muamua: Fa'ataoto 8: 22 – 31. Matua: Mai le amataga le poto, a o leai se lalolagi.

Salomo: 8: 3 – 4 (tali), 5 – 6 (tali), 7 – 8 (tali). Tali: Le Ali'i e, lo matou Ali'i, e silisili lava lou suafa i le lalolagi uma lava.

Faitauga lona lua: Roma 5: 1 – 5. Matua: Ua fa'amaligi mai le alofa o le Atua i o tatou loto e le Agaga Pa'ia.

Aleluia, Aleluia....O le vi'iga i le Tamā ma le Alo, ma le Agaga Pa'ia, o le Atua lava o lo'o soifua, na nofo fo'i, o le a afio mai....Aleluia.

Evagelia: Ioane 16: 12 – 15. Matua: O mea uma lava o i le Tamā, o iā te a'u fo'i ia; e maua e le Agaga Pa'ia mai iā te a'u, ma fa'ailoa atu ai iā te outou.

Tofitofiga o le Upu:

I le lalolagi fa'aonapo nei e tatau ona i ai se ituaiga o 'aula e tautala ai i le Tasitolu Pa'ia i tagata o isi fa'atutuaga. O Moselami ma Iutaia e faigofie ona te'ea le Fa'akerisiano ona e foliga mai o Kerisiano e fa'afiti e Tasi le Atua – se talitonuga e fa'amausaliina e Kerisiano, ae le gata i lea ua latou fa'amausaliina fo'i le Tasi o le Atua i le Tamā, le Alo ma le Agaga. Ole tuputupu malie o le natura fa'aletagata o le āta fa'aletagata o le Ata-mai i tusitusiga a le Feagaiga Tuai na fesoasoani e tapena ai latou na ulua'i mulimuli iā Iesu e iloilo lelei ma fa'amatala lo latou malamalamā'aga i le moni o le Tasitolu. Mai le amataga sa le va'aia le Atua e lē o se unite e tasi ua vavae 'ese ae o se tu'u fa'atasia o le alofa ua aumai e le foaoaga. O le lauga umi a Iesu i le Tausa-mā'aga Mulimuli i le evagelia a Ioane ua tatou faitau ai i le vaitau o le Eseta ua pa'i i le taimi fa'apea le va fealoa'i o le Tamā, Alo ma le Agaga – se mea e malosi toe galue pea, e le gata i lea, ae o se mafutaga o le alofa. A tatou talanoa e uiga i le Atua o le 'alofa' ua tatou fa'aalia se manatu e lē nofo to'atasi ma vavae 'ese. I le evagelia o le asō ua toe fa'aali maia le va feagai ai o le peresona a le Tasitolu o le fatu tonu lea o le Atua; ma mo i tatou Kerisiano o le vala'au ina ia ulu atu le va feagai ai lea ua avea ai i tatou ma suli ma Keriso. O le Atua o le Tasitolu o se tu'u fa'atasia o peresona ma ua a'afia ai ma i tatou i le mafanafana o lea fa'atasiga. E le o se Atua lenei tatou te tomanatu ai mai se mea mamao, se Atua ua mafaufauina e nofo to'atasi, ae o se Atua ua ulufale i se va feagai ai ma le latalata ma lē ua talitonu – o se Atua e 'fifiafa e fa'atasi ma fanau a le tagata.

Metitasio Aso Sa 16 Iuni 2019 Malamalama i le Tolutasi Paia

O le a ta'u atu e se tusiata ia te oe ... na ia tu'u atu uma o ia i lea solo, i lea ata. O le ata o lo'o i lona mafaufau, o mea o lo'o ia taumafai e fa'aleo, ma fa'aali, i luga o pepa po'o luga o tapoleni po'o luga o le piano, ua i ai se uiga fa'apitoa "e fa'amatalaina ai lona lava tagata." E mafai ona tatou malamalamā i le fesoasoani a Sagato Paulo i le uiga na ia tusia ai o le Upu mamana e feso'otai ma le Tamā Fa'avavau o "le fa'aupuga atoa lea o lona lava tagata." O le tusiata, afai o ia o se tusiata moni, atonu e manao e fai le mea e sili; e le o ia, ae i se taimi mulimuli ane, e tu'uina atu atoa o ia lava i le tumutumuga sili mo lana galuega. Ae o le Atua o le tusiata atoatoa, ma o le mea silisili ona matagofie o lana galuega e lē mafai ona avea ma se mea e itiiti ifo nai lo ia lava. Na te fa'aleo lana Upu, fa'aali lona finagalo, ma ua tatau ma avea ai, o se Tagata Lona Lua i le Aiga Atua. Ae ina ua fa'ailoa mai e le Atua lana Upu Fa'avavau, e lē alu ese mai ma ia - ae tumau pea le Upu a le Atua fa'atasi ma ia.

E alofa le tusiata i lana lava galuega i se ituaiga alofa fa'alematua; ua sasa'a atu i ai le tele o lona ola. O le eseesega o mea moni nei e tolu - o le tuisitala o le galuega, i le galuega lava ia, o le alofa o le tuisitala mo lana galuega. O le galuega, o se mea e ola e fa'avavau, o le alofa e lē mafai ona tauia. Ae o le Fa'aaliga o manatu o le tusiata mamana e pei e patino ia te ia lava, ma o le Alofa e fusia ai lo latou va ma so'ofa'atasi. Ma e patino foi lenei Alofa; pei ona fa'amautinoaina mai e le au telosia Kerisiano.

ASO 23 IUNI ASO SA O LE TINO MA LE TOTO PA'IA:

Faitauga muamua: Kenese 14: 18 – 20. Matua: O Metisateko ua avane areto ma uaina.

Salomo: 110: 1 (tali), 2 (tali), 3 (tali), 4 (tali). Tali; O oe lava o le ositaulaga e fa'avavau e uiga fa'atasi ma Mekisateko.

Faitauga lona lua: 1 Korinito 11: 23 – 26. Matua: O aso uma tou 'a'ai ai i lenei areto, ma feinu i lenei ipu, tou te fa'ailoa ai le maliu o le Ali'i.

Aleluia, Aleluia...O a'u le areto ola na alu ifo mai le lagi; pe a 'ai se tasi i lenei areto, ona ola ai lea o ia e fa'avavau...Aleluia

Evagelia: Luka 9: 11 – 17. Matua: Ua latou 'a'ai, ua ma'o'ona uma lava.

Tofitofiga o le Upu:

O le faitauga pu'upu'u mai le tusi o Kenese e uiga iā Metisateko o le a ofo ai le to'atele, ma e le faigofie le faitauina o se fa'ailoa, aemaise pe a pu'upu'u. O le tagata o Metisateko na mauaina mai e le to'atele o le 'au tusitusi o taimi anamua i le taimi o tusitusiga fa'akanone – o Philo, Josephus, 2nd. Enoch ma Qumran. O lo'o ta'ua ai ma se ulua'i Tatalo o le Eukalisitia, o lo'o ta'ua ai o ia na mua'i fa'aliale Taulaga Eukalisitia a Keriso. E masalomia le lē faigofie i faitauga o le asō ona fa'amisi nisi o fa'amatalaga e uiga i lenei mea na tutupu, ona ua na o ni taumafaiga (ua na o le tusi a Eperu ua ta'ua ni tala a Metikaseko i tusitusiga fa'akanone). Ae ui i lea o le tagata lenei na fa'amanuia iā Apera'amo o lo 'tatou tamā ile fa'atuatua ma o lē na avatu iai e Apera'amo le sefulua'i o mea uma sa ia maua. O fa'amanuia iā alalua: fa'amanuia lē e talia le falaoa ma le uaina, fa'amanuia le Atua mo le mea na ia faia (fa'ato'ilalo ana fili). Fa'apea fo'i i le Eukalisitia, latou na momoli atua le falaoa ma le uaina (Tagata o le Atua) ua fa'amanuia iā ma fa'amanuia le Atua mo mea uma sa ia faia mo i latou (fa'aolataga).

O le faitauga mai iā Paulo ua fa'amanatu mai iā i tatou le loloto, laua'itele ma le taūa o le Eukalisitia – e aga'i pea lava i luma: se'ia toe sau le Ali'i – ma le Eukalisitia i le mea'ai mo lenā taimi o le fa'atalitali – se'ia sau Keriso ona muta ai lea o sakalameta.

O le anoanoa'i o falaoa i le toafa i le evagelia ua fa'ailoa mai ai o le Eukalisitia e lē na o se aofa'iga – o le fa'ailoga moni o le agalelei ma le fa'aumau'oa a le Atua.

Metitasio Aso Sa 23 Juni 2019

Aisea tatou te Fa'amanatuina ai le Talisuaga o le Tino o Keriso (Corpus Christi)

O le itu-tagata o lesu ua tumau ma i tatou i le Eukalisitia Paia; i totonu o lea misitelio o le alofa ua fa'ataunu'u ai e lesu mea ofeofogia e lē mafa'atusalia i agaga, ma o galuega uma o le alofa tunoa e ala i isi sakalameta ua fa'apupulaina e lea lava misitelio, o le Ekalesia o le totonugalemu lea ua lē gata i ana tapuaiga, ae o lona ola ma le paiaga.

O le Agaga Paia ma le Eukalisitia e i ai feso'otaiga mamana; o nei misitelio o punavai o le mamā ma le ola, o ni punavai se lua e lē mafai ona tu'u eseeseina; e mafuta e ala i se feagaiga e lē mafa'amatalaina, e tino mai ae tasi ma le punavai e tasi. O le mea lea, e ui lava na fa'atūina le Sakalameta o le Alofa i le po o le Pasio, ae le'i lufilufia i le Ekalesia se'ia o'o i le Penetekoso. I lena aso o le punavai fa'alelagi, fa'atasi ai ma le lalolagi, o le a sasa'a atu i itu uma o le lalolagi le lolo paia o le fa'amamāina; ina ua fa'ataunu'uina e le Agaga Paia, le Atoatoa fa'avavau, mea uma na fa'atūina e lesu, lea, e pei o fatula'au paia, e manaomia le faasūsūina i le mana mai lugā ina ia mafai ai ona totogo.

O le Ekalesia, ua i ai sona lagona loloto i mea fa'alelagi, e patipatia ai le fa'amanatuga o le Eukalisitia pe a uma le fa'amamaluina o le Penetekoso, ua lalagaina i le tapuaiga ia misitelio ua fusia i fuafuaga a le Atua ... Fai mai se tasi tagata, so'o se mapu'e o le alofa po'o mafatia foi, e mafai ona lavea'iina ai le lalolagi; o le Agaga Paia ma le Eukalisitia ua afeifeia le lalolagi i na galu se lua, ona o le Agaga Paia ma le Eukalisitia na mafua uma mai i Kalevalio ma salalau atu i luga o le fogaelele le malō o le satauro na foafoaina i le alofa ma puapuaga.

FAITAUGA MO LE MASINA O IUNI – 2019

ASO 30 IUNI ASO SA 13 TAUSAGA MASANI:

Faitauga muamua: 1 Tupu 19: 16, 19 – 21. Matua: Ua tula'i Elisara, ma alu mulimuli atu iā Elia, ua ia 'au'auna fo'i iā te ia.

Salamo: 16 1 – 2, 5 (tali), 7 – 8 (tali), 9 – 10 (tali), 11 (tali). Tali: Le Ali'i e, o lo'u tofi lava oe, ma la'u ipu.

Faitauga lona lua: Kalatia 5: 1, 13 – 18. Matua: Uso e, ua vala'auina outou i le sa'olotoga.

Aleluia, Aleluia...O au afioga o le agaga ia, o le ola fo'i ia; o iā te oe upu o le ola fa'avavau...Aleluia.

Evagelia: Luka 9: 51 – 62. Matua: Ua matuā fa'asaga atu Iesu e maliu atu i Jerusalema. 'Ou te mulimuli atu iā te oe i mea e te maliu atu i ai.

Tofitofiga o le Upu:

E i ai le fa'aupuga - e fa'aauau le matafaioi e masani ona fa'aoga i le gagana Peretania ma na ulua'i maua mai ile faitauga muamua o le asō. O Elia le perofeta na tu'u atu iā Elisara ma lafoa'ia lona ofu iā te ia. Na talosaga atu Elisara (mo tatou e foliga mai e uiga 'ese)'inā tu'u mai ia iā te a'u se'i matou feasogi ma lo'u tamā ma lo'u tinā.' Ona alu ai lea o Elisara. I le Tusi e Lua o Tupu, na avea Elisara ma fa'auō a Elia ma na fa'atasi ma ia ina ua avea Elia i le lagi. Na tu'u e Elia lona ofu ma na avea e Elisara (2 Tupu 2: 13) ma na mafai ai ona faia ni vavega. Ona avea lea o Elisara o le matafaioi a Elia fa'aperofeta i le tautala i upu a le Atua ma faia fa'ailogia aga'i iā i latou (aemaise ta'ita'i) ua o 'ese mai le feagaiga. O le tau'aveina o se matafaioi a se isi (ofu), o se tala fa'asino tonu i le faitauga lea. O le faia lea o le matafaioi mo le isi augatupulaga o mea na tau'ave e i latou i tupulaga ua mavae. Mo Kerisiano o se vaega taūa o lo latou fa'asinomaga. E leai se isi na fa'avaeina se evagelia fou pe tauave se isi 'au'aunaga fou ua na o mea na tu'uina mai e latou na muamua atu. O se fa'avae taūa lenei o fa'aKerisiano Katoliko. E o'o lava iā i latou na fa'avaeina nisi auala fou (mafaufau iā i latou na fa'avaeina ituaiga) ua va'ai i ai o le fa'aogaina o nisi vaega o le tū ma aga.

Ae pagā lea o le fa'aauauina e i ai fo'i ona itū tau fa'amata'u, ma o le mea lenā o lo'o talanoa mai ai Paulo i le faitauga lona lua. O se tuputupu a'e taūa tele i seneturi e tele ua tuana'i o le maitauina lea o le vaisū o se moni i olaga o tagata. O se mana'ona'o ma se fia'ai e mafai ona avea ma naunauta'iga e le mafai ona pulea e aunoa ma se fesosoani. O se 'aula lenā ua va'ai i ai Paulo i le agasala. E le gata o se fa'aleagaina o se tagata lelei, o se mea e mafai ona pulea lea tagata – ma e fa'apenā ona galue le agasala – e pei ona fai mai ai Paulo o se fa'apologaina – ua leai ma se sa'olotoga atoatoa. O le mea lea o latou ua agasala e mana'omia se fesosoani, ma o lenā fesoasoani e tatau ona sau mai le Atua, mai le Agaga o lo'o avanoa pea mo tagata uma. E le o se mea lenei e pulea e se loto malosi. E le mafai ona fo'ia e le malosi'aga o le tu'inanau le agasala ma ua fa'aigoaina 'o le Pa'ū – e pau le mea e fo'ia ai lenā, fai mai ai Paulo, o le pulea lea e le mana o le Agaga Pa'ia.

Metitasio Aso Sa 30 Iuni 2019 Sa'ilia se "matālalāga mautū" o Keriso

E tele mafua'aga ua fa'atalitonuina ai a'u, e tatau ona ou taula'i ma le amiofa'atamāali'i fa'atasi ai ma lo'u malosi atoa. Muamua, ua sili atu le alofa o le Atua ia te a'u mo a'u lava, ina ia fa'aaogaina a'u i le lumana'i mo lana galuega: i le manatu tūtasi e faia ai ae peitai ua na'o lo'u fefe. E a! E lē auai uma ea i le Atua ina ua mavae lona alofa tunoa ia te a'u, pe sefe se mea mo a'u lava ina ua uma ona ou maua mea uma mai ia te ia? E lē mafai ona malie lo'u loto e galue fa'apea. Lona lua, a ou va'ai i lo'u fa'atauva'a, pe o le a le mea e mafai ona ou faia mo le vi'iga o le Atua e ala i le fa'aaogaina o a'u atoa i lana galuega, ou te fa'aulugogo i le manatu tupito e momotueseina o ia mai mea uma. Tolu, o le a leai se saogalemu mo a'u i so'o se faiga fa'amalosi: Ou te iloa a'u lava, ma o le a lē pine ae ou pa'ū atu i se mala ogaoga. Lona Fa, na'o i latou ua tu'uina atu atoa i latou lava i le Atua e fa'atalitali i le oti ma le filemu. Lona Lima, na'o latou ia e ta'ita'ia i se olaga to'afilemu ma le saofagā. Ono, ina ia mafai ona faia ni mea se tele mo le Atua, e tatau ona foa'i atoa mo ia. Peitai, pe itiiti e te taofia mo oe lava, o le a lē mafai ona e faia ni mea tetete mo isi. Lona Fitu, i lenei tulaga, ia tumau i le fa'atuatua ola ma le fa'amoemoe mausalī, ia tatalo i le Atua ma le mautinoa ma u'umau le amiotonu.

Taumologo

FAITAUGA MO LE ASO SA MUAMUA O IULAI – 2019

ASO 7 IULAI ASO SA 14 TAUSAGA MASANI:

Faitauga muamua: Isaia 66: 10 – 14. Matua: ‘Ou te fa’atupu le manuia iā Ierusalem e pei o le vaitafe.

Salamo 66: 1 – 3 (tali), 4 – 5 (tali), 6 – 7 (tali), 16, 20 (tali). Tali: Le lalolagi uma e, ia outou alalaga atu i le Atua.

Faitauga lona lua: Kalatia 6: 14 – 18. Matua: O a’u ‘ou te tauave fa’ailoga o le Ali’i o Iesu i lo’u nei tino.

Aleluia, Aleluia...O a’u nei le malamalama o le laolagi; o lē mulimuli mai iā te a’u e iā te ia le malamalama o le ola...Aleluia.

Evagelia: Luka 10: 1 – 12, 17 – 20. Matua: E o’o atu iā te ia la outou fa’amanuia.

O LE FA’ASOLOGA O MISASA MO IUNI 2019

	Aso Sa	Afio A’e Iesu i le Lagi	
1st. Sunday	0.8.30am	Strathmore	Patele Tuli
2 Iuni 2019	11.30am	Titahi Bay	Patele Andrew
2nd. Sunday	Aso Sa	O le PENETEKOSO	
9 Iuni 2019	11.30am	Naenae	Patele Andrew/Tuli
3rd. Sunday	Aso Sa	TASITOLU PA’IA	
16 Iuni 2019	11.00am	Newtown	Leai se Misasa
	11.00am	Porirua	Patele Andrew/Tuli
	11.30am	Wainuiomata	Patele Mareko
4th. Sunday	Aso Sa	TINO male TOTO O	KERISO
23 Iuni 2019	11.00	Lower Hutt	Patele Tuli
	11.30am	Stokes Valley	Patele Andrew

20

Aso To’ona’i 1st. Iuni—Aganu’u Samoa—Bishop Viard College @ 6.30pm

Aso Gafua 10 Iuni —Aoga Aso Sa Fono @ 6.30, Catholic Centre

Aso Faraile 14th Iuni—Kapelania Fono @ 6.30, Catholic Centre